

PAOT TE KONĪN XOP PU KAX'ĀMI' I

1 ¹Ūgmūn Paot, ha Topa tek mūn yāykutnāhā, tu nūgkutnāhā 'āte hāpoxpmā Yeyox Kunnix pu', tu xa kax'āmi', yūmūg xape Xox mūtik 'āte xa ka'āmi', ²nūy tappet xa mō'kutnā, nūy kōmēn Konīn yōg kuxa mām ka'ok xop xohix hah mō'kutnā, 'ākuxa xohip-xet Kunnix kuxa mūtik hah. Yā 'āxop Kunnix yōg xop, nūy Topa hā tikmū'ūn xe'e'. Hak mū'āte tappet mō'kutnā'ax kamah 'ūkuxa mām ka'ok xop xohix hah, nōm xop te yūmūg xuxyā Yeyox Kunnix tu' xak, pu tu' kox ka'ogā'. Yā Yeyox Kunnix te' kuxa mām ka'ok xop xohix hā' xuxyā.

³Pūyā Topa yūmūg Tak 'ākuxa māmā, nūy tu yūmūg xuxyā Yeyox Kunnix mūtik xa hāmmāxā.

Topa te Kunnix hā yūmū'ā hāmmāxāhā'

⁴Topa te xa hāmmāxāhā, hak hittup, tu: 'Āmax, Topah! Kaxīy. Yā Topa te xa hāmmāxāhā, Yeyox te 'āxop pupi' xok ha hāmmāxāhā. ⁵Yā 'ākuxap-xet Yeyox Kunnix kuxa mūtik, pu hām'āktux ka'ok ha 'āyummūgāhā, xa hāmyūmmūg xohix. ⁶'Ākuxa mām ka'ok hām'āpak'ax kopah, ha Kunnix 'āktux, ⁷yīy Topa te xa hāmmāxā xexkah, 'īhā 'āxop te Topa yōg hāptup mō'nā'ax xexka hip, 'īhā yūmūg xuxyā Yeyox Kunnix nūn putup putpu'. ⁸Ha 'āka'ogāp-tup, 'īhā' nūn'ax hip, xayīy 'ākuxa tu max, 'īhā yūmūg xuxyā Yeyox Kunnix xupep, nūy 'ūhep xop xohix yōg hāpoxpmā'ax kopit. ⁹Topa xip ka'ok, tu mō'āgmūg xohix hā' xip ka'ok, tu yūmūg mūtik tihī, tu yūmūg xānāhā, 'ū nūl, nūy yūmūg kuxap-xet yūmūg xuxyā kuxa mūtik, nūy Topak-tok Yeyox Kunnix kuxa mūtik yūmūg kuxap-xet.

'Ūkuxa mām ka'ok xop te yāy tuk-mīy

¹⁰Ūkxape xop, 'āte 'āxop tu' xak, xap-tox puxet xix kuxap-xet, nūy yāy mūtik ta tuk-mīy hok. Yā yūmūg xuxyā te 'ā' hōm yāy 'āxet'ax, 'āte xa' xak, xayīy 'āgāy hok. ¹¹Kono xape te xa 'āktux, tu 'āxop te yāy tuk-mīy'ax 'āktux, ¹²ha kaxīy tikmū'ūn 'ūm te: "Ūgmūn yā Paot yōg," kaxīy, ha' nōy te: "Ūgmūn yā 'Apot yōg," kaxīy, ha' nōy te: "Ūgmūn yā Pet yōg," kaxīy, ha' nōy te: "Pak mūn yā Kunnix yōg," kaxīy. ¹³'Ok 'āxop te Kunnix yōg tikmū'ūn koxip putup yāy pu'? 'Ok 'ūgmūn te mīpkupnix tuk xok 'āxop

pupi? 'Ămhok! 'Ok ľate yăy 'ăxet'ax hōm, pu tikmũ'ũn 'ũm 'ăp-tox pix? 'Ap hōm'ah. Kunnix puxet te yăy 'ăxet'ax hōm, pup-tox pix. 'Ak mũn'ah.

¹⁴Āte Kinix xix Gax putox pix, păyă tikmũ'ũn nōy putox pix 'ohnăg, yĭy 'ăte: 'Ămax Topah! Kaxĭy. Tuk hittup. ¹⁵Yă tikmũ'ũn te hăm'ăktux hok, hu: "Paot te yăy 'ăxet'ax hōm puyĭp-tox pix," kaxĭy. Yă' koit. ¹⁶Năy. 'Āte 'Exteo putox pix kamah, xi' xape xop, pap-tox nōy 'ap pix'ah 'ăte!. ¹⁷Kunnix te nũ 'ũm kutnă'ah 'ũp-tox pix. 'Ămhok. Pa nũgkutnăhă, 'ũyĭy 'ăte hăm'ăpak max'ax 'ăktux, 'ăte hăm'ăktux max pu kaxxop tuk-tup yũmmũg max, nũy Kunnix xexkană. Yă yũmũg pupi' xok mĭkupunix tu!, yă hăm'ăpak max'ax 'ōhōm.

Topa te Kunnix hă tikmũ'ũn pu hămyũmmũgăhă'

¹⁸Tikmũ'ũn kuxa yũm 'ohnăg hăm'ăpak'ax max kopah, puxi! yĭxix, tu hăm'ăktux'ax putup nōg, tu: "Āp-tox kummuk!" kaxĭy, tu! yĭpkox 'ohnăg. Pa yũmũ'ăte! xupak, tu: Hamũn! Yă hămyũmmũg xe'e! kaxĭy, tuk yĭpkox pip hăm'ăktux'ax ka'ok pu!, ha Kunnix yũmũg pupi' xok 'ăktux, ha Topa ka'ok, hu yũmũg kuxa kummuk xit, nũy kuxa max mō'tat 'ũyănăn tu!. Yă hăm'ăktux'ax ka'ok, tu yũmũ'ă hă hăm'ăpak max xe'e!. ¹⁹Yă Topa yōg tappet te:

"Āte hăm'ăktux tox xop yōg hăm'ăktux kuxyăp-tup," kaxĭy.

²⁰Piyăp xip tikmũ'ũn te hitop tu yăy pe'paxex, hu: "Āte hămyũmmũg," kaxĭy. Piyăp xip tikmũ'ũn te hitop tu yăy pe'paxex, hu: "Āte hăm'ăktux max," kaxĭy. Yă' mōg, tu! yĭpkox 'ohnăg. Topa te hăm'ăktux hitop'ax tu! mũg, hap-tox kummuk xop yōg hăm'ăktux.

²¹Topa te hămyũmmũg, tu! tux hok, pu tikmũ'ũn hămyũmmũg hok, nũy hămp'e'paxex'ax hă Topa mũn yũmmũg hok, 'ĭhăk mũ'ăte hăm'ăpak max'ax 'ăktux, puyĭy tikmũ'ũn yũmmũg, ha Topa te tikmũ'ũn hă tu tehet, nōm xop kuxa măm ka'ok hăm'ăpak max kopah, hă tu tehet, 'ĭhă' kuxa kummuk xit, nũy nō kuxa max mō'tat 'ũyănăn tu!. ²²Yoneo xop te Topa yōg hăpxopmă xe'ėgnăg xak, nũy pėnă!, nũy hăm'ăpak max'ax yũmmũg, ha Genex yōg puknōg xop te hămyũmmũg xak, ²³pak mũ'ăte Kunnix 'ăktux, ha mĭpkupunix tu! xok yũmũg pupi!, yă hăm'ăpak max. Pa Yoneo xop tep-tup nōg, xi! puknōg xop te hăm'ăpak'ax 'ăktux kummuk, ²⁴pa Topa te yăy yōg tikmũ'ũn xănăhă!, pe Yoneo yōg tikmũ'ũn, pe! puknōg, ha! yĭmōgatux, pu hăm'ăpak max'ax 'ăpax, ha Topa te Kunnix nũ'kutnăhă!, pu yăy yōg tikmũ'ũn ka'ogă!, nũy yăy yōg tikmũ'ũn yũmmũgă!. ²⁵Ha tikmũ'ũn 'ũm te hitop tu hăm'ăktux, hu: "Yă hăm'ăpak'ax kummuk, tu hămyũmmũgă hok," kaxĭy. Năy, tikmũ'ũn te hăm'ăktux kohe!. Nōm hăm'ăpak'ax yă Topa yōg hămyũmmũg'ax xe'e!. Ha! nōy 'ũm te: "Yă hăm'ăpak max'ax pu'uk, tu! ka'ogă hok," kaxĭy. Pa Topa te! xuktux, yĭy hăm'ăpak'ax ka'ok.

²⁶Ūkxape xop, hămp'e'ăpaxeh nōmhă. Hōmă 'ăxop te hămyũmmũg 'ohnăg, tu tikmũ'ũn nōy xat 'ohnăg, ha Topa te 'ăxănăhă!, yă tikmũ'ũn te xa 'ăktux 'ũnōy pu!, hu: "Hămyũmmũg kutōgnăg 'ōhōm," kaxĭy. Tu xa pe'paxex 'ohnăg. ²⁷Pa Topa te nōm tikmũ'ũn pu! hupmăhă!, 'ĭhă 'ăyĭmōgatux, 'ăk-tōgnăg hah 'ăyĭmōgatux, xix 'ăpuk'uk hah 'ăyĭmōgatux. ²⁸Hōmă 'ăxop yă hămhok xop, yă Topa hă! puknōg

'āxop, yīy Topa te 'āyīmōgatux, nūy nōm tikmū'ūn xop yōg hāmpē'paxex kuxyā',
 29 pu tikmū'ūn 'ūm te yāy mūn xexka pe'paxeh hok Topa keppah. 30 Pa Topa te
 'āxop hā yāykoṭīnnāhā, tu yāy tu nū' xok Kunnix hā, ha Kunnix te hāmyūmmūg
 xohix, tu yūmūg hīnnāhā, 'ū tu hi xe'e!, yā Topa te mō yūmūg yāy, tu yūmūg
 kuxa tupmāhā, pu Topa hā yūmū'ā tikmū'ūn. Yā Kunnix te mīpkupnix tu' xok,
 nūy yūmūg yōg hāpxopmā'ax kummuk hā' pago. 31 Yīy Topa yōg tappet te:
 "Tikmū'ūn te hāmpē'paxex xexka putup, pūyā Topa yōg hāpxopmā'ax pe tu paxeh
 xexkah, nūy yāy yōg hāpxopmā max pe tu paxeh 'ohnāg," kaxīy.

Paot te Kunnix xok'ax 'āktux

2 1 Ūkxape xop, hōmā 'āte xa hām'āktux, tu xa Topa yōg hām'āktux'ax
 'āktux. Hōmā, hāmyāxatamuk xohix hā Topa yīy 'ohnāg, tu hām'āktux
 'ohnāg, pāyā hōnhā Topa te hām'āktux, yīy 'āte xa' xuktux Topa pupi!, tu
 hām'āktux max, puyīy kaxxop tuktup kama yūmmūg max. 2 Yā 'āte
 hām'āktux'ax nōy putup 'ohnāg, nūy Yeyox Kunnix puxet 'āktux, nūy Yeyox
 xok'ax puxet 'āktux. Yā mīpkupnix tu' xok, yūmūg pupi! xok, nūy yūmūg kuxa
 kummuk xit, nūy kuxa max tat 'ūyānān tu!. 3 Hōmā 'āhak mōg, tu tak pu'uk, tuk
 kuxānōg, 4 tu Topa yōg hām'āktux xa' xuktux, xix xa hāmyūmmūgāhā, pāyā 'ap
 hām'āktux max'ah, puyīy tikmū'ūn te: "Yā hāmyūmmūg 'ōhōm!" kaxīy. 'Āmhok,
 pa Topa Koxuk tek ka'ogāhā, 'ūyīy Yeyox Kunnix 'āktux, hak ka'ogāhā kamah,
 'āte hāpxopmā ka'ok, pu tikmū'ūn pēnā, nūy: "Yā Topa te Paot nū'kutnāhā, pu
 yāy pupi hām'āktux yūmū'ā, tu hāpxopmā ka'ok xe'e!" kaxīy. 5 Yīy 'ākuxa mām
 ka'ok Topa kopah, hu 'ākuxa mām 'ohnāg tikmū'ūn yōg hāmyūmmūg'ax puknōg
 kopah, yā Topap-xet kopā 'ākuxa mām ka'ok, 'ūka'ok hah.

Topa te hāmyūmmūg xe'ēgnāg

6 Ha 'āte! kuxa mām ka'ok xop pu hām'āktux, nōm xop te Topa Koxuk
 pu' yīpkox pip, ha 'āte Yeyox Kunnix 'āktux, 'ōhōm yūmūg pupi tu xok, nūy
 yūmūg kuxa kummuk xit, pāyā hām xexka yōg tikmū'ūn te hām'āktux kohe!,
 tu Yeyox Kunnix putup nōg, xi' xexka xop tep-tup nōg, ha tikmū'ūn te nōm
 xat'ax xop pu' yīpkox pip putup 'ohnāg. 7 Yā 'āte Topa yōg hām'āktux 'āktux,
 ha hāmyūmmūg xe'e!. Hōmā hāmyāxatamuk xohix 'īhā, 'ap hām 'ūm xip'ah,
 pāyā Topa te hāmpē'paxex, tu yūmū'ā ha hāmmaxnā xexkap-tup, hu: "Pūyā
 yāy kutok tikmū'ūn pupi tu xok, nūy nō kuxa kummuk xit," kaxīy. Pāyā'
 xaptop, tu' xuktux 'ohnāg, tu' yūmmūgā 'ohnāg. 8 Pax pu Topa hā' puknōg
 xop yūmmūg, puxix yūmūg xuxyāp-tex hok, 'ūgāy tup-tex. Pāyā' kuxa
 mām 'ohnāg, hu yūmūg xuxyā max xe'ēgnāg putex. 9 Pa Topa yōg tappet te
 hāmmaxnā xexka 'āktux, tu yūmūg xuxyā xok yūmūg pupi'ax 'āktux, hu:
 "Tikmū'ūn te' pēnā 'ohnāg, tu' xupak 'ohnāg,
 tu' pe'paxex 'ohnāg,
 pa Topa te hāmpē'paxex, nūy yāy yōg tikmū'ūn pu hāmmax nā xexkah,
 nūy tup-tup pax xop pu hāmmaxnā xexkah," kaxīy.

¹⁰Yā hōmā Topa yīy 'ohnāg, pa hōnhā yāy Koxuk te yūmū'ā hām'āktux, nūy yūmūg yūmmūgā', puīyī xehomip xaptop 'ohnāg. Yā Topa Koxuk te tikmū'ūn yōg hāmp'e'paxex xohix yūmmūg, tu Topa yōg putup'ax xohix yūmmūg, xix Topa yōg hāmp'e'paxex xohix yūmmūg. ¹¹Tikmū'ūn yāp-xet te yāy yōg hāmp'e'paxex xohix yūmmūg, yāp-xehnāg te hāmyūmmūg, ha Topa Koxuk yāp-xehnāg te Topa yōg hāmp'e'paxex yūmmūg. ¹²Ha Topa te yāy Koxuk xe'ēgnāg yūmū'ā nū'kutnāhā', tu' koxuk puknōg yūmū'ā nū'kutnā 'ohnāg, yā Topa Koxuk te yūmū'ā hāmyūmmūgāhā', nūy Topa yōg hām'āktux yūmūgā'.

¹³Yīk mū'āte Topa Koxuk yōg hām'āktux'ax 'āktux putup, xa tikmū'ūn yōg hām'āktux'ax pu 'āyīpkox hok. Yā kaxīy 'ūgmū'āte hām'āktux, tu Topa Koxuk yōg hām'āktux'ax yūmmūgāhā', tu Topa yōg tikmū'ūn pu hāmyūmmūgāhā', nōm xop te Topa Koxuk pu' yīpkox pip. ¹⁴Pa Topa Koxuk te tikmū'ūn 'ūm kopa' xihip hok, puxix tu nōm ka'ogā hok. Nōm tikmū'ūn yā Topa hā' puknōg, tu' yōg hām'āktux 'āpak, pāyā' yūmmūg 'ohnāg. Yā' Koxuk xe'ēgnāg te Topa yōg tikmū'ūn yāp-xet ka'ogāhā'. ¹⁵Topa Koxuk te tikmū'ūn kopa xihip, puxix tikmū'ūn pa hāmyūmmūg, nūy hāpxopmā'ax xohix kopit, xix hāmyūmmūg, pe' max, pe' kummuk. Pa' puknōg xop te nōm tikmū'ūn yōg hāpxopmā'ax kopit hok. ¹⁶Yīy Topa yōg tappet te:

“Ōk tikmū'ūn 'ūm te Topa yōg hāmp'e'paxex yūmmūg?

'Ok tikmū'ūn 'ūm te Topa pu hāmyūmmūgāhā'? 'Āmhok.

Topa yāp-xehnāg te yāy yōg hāmp'e'paxex yūmmūg,
xix yāy pu hāmyūmmūg xe'ēgnāg,” kaxīy.

Pa Kunnix te hāmyūmmūg, tu yūmū'ā hāmyūmmūgāhā', 'ūyīy putox puxet Kunnix putox mūtik.

Yūmū'ā Topa hā kāmānat

3 ¹Āte xa hāpxe'e 'āktux. Yā 'āxop tek mūn hā 'āxape', pa 'āte xa hām'āktux yūmmūg, 'okpa Topa Koxuk te 'ākopa' xip. Yā 'āxop te hāmp'e'āpanōm kummuk, Topa hā' puknōg xop putuk 'āxop te hāmp'e'āpanōm, nōm te Topa pu' yīpkox 'ohnāg, xix kaxop putuk hāmp'e'āpanōm, nōm xop te Topa yōg hām'āktux yūmmūg kutōgnāg, yā kaxop putuk, 'ākuxa mām pu'uk tu'. ²Kaxop pu'ūgnāg te' yōktat hep xo'op, tu' xit'ax ka'ok mā hok, ha kaxīy 'āxop pu'uk, tu Topa yōg hām'āktux yūmmūg kutōgnāg, hōmā xix hōnhā 'ākuxa mām pu'uk. ³Āxop te Topa hā' puknōg xop putuk, tu hāpxopmā kummuk, tu' yāy kix pax, xix yīpkumīy pax, tu Topa hā' puknōg xop putuk, tu hāpxopmā kummuk. ⁴Tikmū'ūn puxet te: “'Ūgmūn yā Paot yōg,” kaxīy, ha' nōy te: “Pak mūn yā 'Apot yōg,” kaxīy. Yā Topa hā' puknōg xop putuk hāpxopmāhā'.

⁵Apot yā 'a' xexka'ah, xik mūn 'ak xexka'ah. Yāk mū'āte Kunnix tu hāpxopmāhā', puxi!. Tu xa hām'āpak max'ax 'āktux, ha 'ākuxa mām ka'ok yūmūg xuxyā kopah. Yūmūg xuxyā tuk mū'āte hāpxopmāhā', yāk mūg xat, 'ūyōg kāmānat hah. ⁶Tikmū'ūn te hāpxa xexka hā' hām, ha tik hāmāxap te hāpxop xap xok, ha' nōy kūnāy tu' hām, tu kōnāg hā hāpxop xokax pix, puīyī tu tuk mō'ka'ok. 'Ūtix

hām, pāyā Topa te hāmmaxnāhā. Ha kaxīy 'āte xa hām'āpak max 'āktux, ha 'Apot te xa hāmyūmmūgāhā. Tikmūg hām, pāyā Topa te xa hāmmaxnāhā, tu 'ākuxa māmāhā. ⁷Kāmānat xop 'a' xexka'ah, pāyā Topa mūn xexka xe'ēgnāg, tu hāmmaxnāhā. ⁸Ha kāmānat xop xohix yāy putuk, ha Topa te' hām'ax tu' pagop-tup, tu kāmānat hām xexka tu' pagop-tup punethok, ha kāmānat hām kutōgnāg tu' pagok-tōgnāg putup. ⁹Yā 'Apot xik mūn hām Topa tu', 'āxop ha tikmūg hām, puyīy Topa 'āka'ogā, yīy 'āxop te hāpxa putuk, ha Topa te xa hāmmaxnāhā, ha 'āxop te mīptut putuk kamah, yā Topa yōg mīptut. ¹⁰Ūxuxyā te' xat, pu mīptut max mīy, tu tik puxet xat hāmāxap, pu mīkaxxap mīm mōg hāpkox kopah, pu nō māykup mō'tat, ha' nōy kūnāy tu' xat, pu nōm mō'xix hāpkox kopah. Ha Kaxīy Topa tek ka'ogāhā, pu hām'āpak max 'āktux hāmāxap, puyīy tikmū'ūn kuxa mām ka'ok Yeyox Kunnix kopah, ha 'Apot kūnāy tu' nūn, nūy kuxa mām ka'ok xop yūmmūgā max. ¹¹Mīptut xuxyā te māykup ka'ok putup, yā māykup te mīptut ka'ogāhā, pu tu yūm ka'ok. Ha kaxīy Topa te Yeyox Kunnix yāy kutnāhā, pu yāp-xehnāg hā yūmmūg pupi tu' xok, nūy yāp-xehnāg hā' kuxa kummuk xit, nūy kuxa max tat 'ūyānān tu'. 'Ap nōy xip'ah. ¹²Ha tikmū'ūn yāg te pipkup yānām 'āta hā hām'āta max mīy, xi' nōy te pipkup yānām ponnok hā' mīy, xi' nōy te xap max hā hām'āta mīy. Ha' nōy te mīmpe hā hām'āta kummuk mīy, xi' nōy te xuxnak hā' mīy, xi' nōy te xuxnāg xux hā hām'āta' mīy. Hā kaxīy Topa yōg kāmānat hām kamah. Ūyāg hām max, tu Topa yōg hām'āktux 'āktux, tu Topa yōg tikmū'ūn ka'ogāhā' pu tu hāmyūmmūg. Ha' yāg nōy hām kummuk, yīy Topa yōg tikmū'ūn pu'tuk, tu hāmyūmmūg 'ohnāg. ¹³Ūxuxyā te mīptut kummuk mīy, puxix kuxap hā mō'xut mō'ka'ok, ha' nōg. Hā kaxīy Kunnix yōg hāptup xe'e mō'nāp-tup, 'ihā Topa te yāy yōg kāmānat xop yōg hāpoxpmā'ax xohix kopit. Kāmānat hām kummuk, puxi' yōg hāpoxpmā'ax xaxogā'. ¹⁴Ūxuxyā te mīptut max mīy, puxix kuxap hā mō'xut 'ohnāg, yā' yūm ka'ok. Kaxīy kāmānat hām max Topa tu', puxix Topa yōg hāpoxpmā'ax kopit, nūy nō kāmānat ha hāmmaxnā xexka'. ¹⁵Mīptut kummuk mō'xut kuxap hā, puxix kāmānat te hām hok xip, tu tayūmak pop 'ohnāg, pāyā' xok'ah. Kaxīy Topa yōg kāmānat hām kummuk, puxix yāy kuxa tup, Topa te' tupmā hah, tu Topa yōg putat hām hok hā' mōg, pāyā Topa te nōm kāmānat pu pexkox yōg hāpoxop 'a' hōm putup'ah. ¹⁶Yā 'āxop Topa pet xe'e, 'ākopa' xip tu', ha 'āxop te hāmyūmmūg, ha Topa Koxuk te 'ākopa' xip, ¹⁷yīy Topa te 'āpēnā max, 'ākopa' pet tu'. Tikmū'ūn gāy te 'ākoxyōy putup, puxix Topa' yānān tu 'ūkoxyōy, 'āxop yā Topa pet xe'e.

¹⁸Pūyā 'āmūn yāy hā mō'āmā hok. Tikmū'ūn te hāmpel'paxex, hu: "Āte hāmyūmmūg xexka!" kaxīy, pāyā' hitop tu hāmpel'paxex, yā Topa te: "Ōhōm hāmyūmmūg 'ohnāg, 'ūkuxa mām 'ohnāg tu'," kaxīy. ¹⁹⁻²⁰Topa hā' puknōg xop te: "Yā hāmyūmmūg nō'ōm," kaxīy, puxix Topa te: "Pūyā yāy hā mō'āmā, hāmyūmmūg hok tu!" kaxīy. Yīy Topa yōg tappet te: "Topa te yāy mūn hā' puknōg xop yūmmūg, tu' yōg hāmpel'pānōm yūmmūg, ha hāmyūmmūg 'ūhitop tu', tup-tox kummuk xop putuk," kaxīy. ²¹Pūyā tikmū'ūn yāy mūn xexka 'āktux hok, tu yāy yōg hāpoxpmā'ax tu' kuxa hittup hok. Yā hāpoxop xohix 'ōgnū', pu Topa xa hāmmaxnā'. ²²Yīy Paot, xix 'Apot, xix Pet, 'ūxohix te 'āpēnā max, ha

Topa te hām xexka mīy, nūy 'ākuxa hittupmā'. Tu 'ākuxa hīnnāhā, xayīy 'āxakix 'ihā, 'āmōg pexkox hah. Yā hōnhā Topa te mō'āyāy xe'ēgnāg, xix hōmā mō'āyāy xe'ēgnāg, xix hāptup 'ihā mō'āyāy xe'ēgnāg putup. Yā' xohix 'ōgnū, ²³ha 'āxop yā Kunnix yōg tikmū'ūn, ha Kunnix yā Topa yōg hāmīyāy kutnā'ax xe'ēgnāg.

Yeyox yōg mō'pok xop

4 ¹Ūgmū'āte xa hā Kunnix yōg kāmānat, tu hāpxopmāhā, nūy Kunnix pupi xa hāmīyūmmūgā, nūy xa Topa yōg hām'āktux xe'e 'āktux, ²Yīy Topa tek mūg xat 'ū hāpxopmā max, nūy xa hāmīyūmmūgā' max, ha yūmūg xuxyā tek mū yōg hāpxopmā'ax pēnāp-tup, nūy yūmmūg, 'ok pek mū'āte hāpxopmā max, 'ok pek mū'āte hāpxopmā kummuk. ³'Axop tek mūg hām'ax pēnāp-tup. Pūyā tikmū'ūn pa te hāmīyūmmūg tuk mūg hām'ax pēnā'. Yā' hitop. 'Āte yāy yōg hām'ax pēnā hok yāy pu kamah. ⁴'Ūgkuxa te' mīy max 'āktux, pa yūmūg xuxyā puxet tek hām'ax pēnāhā, tu' yūmmūg, 'ok pek hām max, pek hām kummuk. ⁵Yīy 'ānōy yōg hāpxopmā'ax kopit hok, nūy nō 'āktux kummuk. Nāy, 'ūhip, pu Topa' kopit, 'ihā nū'. Tute hāpxop xaptop'ax mūg putup, xix tikmū'ūn yōg hāmpe'paxex yūmmūg putup, 'ihā Topa te hāpxopmā'ax max pu pago.

⁶'Ūkxape xop, 'āte xa hām'āktux tap, tuk mūn 'āktux, xix 'Apot 'āktux. 'Ātek mūg 'āktux, xayīy 'āxop hāmīyūmmūg, ha tappet te' xat, hu: "Tappet yōg hām'āktux pu 'ipkox pi,'" kaxīy. Yā' kummuk, tik 'ūm 'āktux max, 'ihā' nōy 'āktux kummuk. ⁷'Ok 'āxop te yāy xexka pe'āpaxex? 'Ok 'āxop te 'ānōy kutōgnāg pe'āpaxex? Yā' kummuk. Topa mūn te xa hāmmaxnāhā, tu' hok hā hāmmaxnāhā, xayīy yāy hitop xexka 'āktux hok!

⁸'Axop yā yāy pe'āpanōm 'ūptexop, tu yāy pe'āpanōm 'āxexka xop, tuk mūg pe'āpanōm kutōgnāg xop, Pāyā yāy mō'āmā. 'Ūyā yūmūg xohix xexka xop! ⁹'Āte hāmpe'paxex. Yāk mū'ā mō'pok xop, pe Topa hā yūmūg ka'ax xop, nūy tikmū'ūn 'ūgmūg kix, 'ihā xohix te' pēnāhā, xix pexkox yōg nū'pok xop xohix te' pēnā kamah. ¹⁰Ha Topa hā' puknōg xop te: "Ūp-tox kummuk," kaxīy, huk mūg 'āktux, tu 'āxop 'āktux max, pāyā yūmūg xohix Kunnix yōg tikmū'ūn. Hak mūg pu'luk, pa 'āka'ok, ha 'āp-tup pax, pak mūg putup nōg. ¹¹Yā putup tek mūg kix, hak mū'āte kōnāg tat'ax xak. 'Ūgmūg xax kunox, ha' gāy xop tek mūg kix, tu mūg xūyghāhā, 'ak pet 'ūm yūm'ah. ¹²Tuk mūg hām punethok nūy xit, 'ihā tikmū'ūn te: "Pūyā Topa 'ākix!" kaxīy. Hak mū'āte hām'āktux hā' yānān, hu: "Pūyā Topa xa hāmmaxnā!" kaxīy. Hak mūg kummughāhā, pāyāk mū'āte' gāy xop yōg hām'āktux kummuk hā' tot, tu hāmmax hip. ¹³Ha' gāy xop tek mū'ā hāpkummughāhā, tuk mūg mānōg, 'ihāk mūg yīy pu'luk, nūy nōy gāy kuxyā. Yā Topa hā' puknōg xop tek mūg putup nōg, tu: "Mōg, nūy 'āpep!" kaxīy.

¹⁴'Āte xa kax'āmi, nūy xa hāmīyūmmūgā. 'Āte 'āxop putup pax, 'ūgkutok putuk hah, 'a 'āte xa' hupmāp-tup'ah. ¹⁵Yā tik punethok te xa hāmīyūmmūgā'ax, pak mūn puxet hā 'ōg 'ātak. 'Āte xa hā 'ātak, xa hām'āpak max'ax 'āktux tu', ha 'ākuxa mām ka'ok Kunnix kopah. ¹⁶Hu 'āte xa' kax, pu hāpxopmā max, nūy 'ūgmūn

putuk. Yã 'áte hãpxopmã max, ¹⁷hu 'áte Timõn mõ'kutnãhã', tuk mũn hã 'ũgkutnã', pu hãpxopmã nũ mütik, hak mũg tix hãm max yũmũg xuxyã pu! 'Ãxutigãp-tup, xayĩy Topa yõg putat hã 'ãmõg ka'ok, yã 'ãkuxa mãm ka'ok Yeyox Kunnix kopah, ha taxĩy 'áte hãmyũmmũgãhã', 'ũkuxa mãm ka'ok xop xohix pu hãmyũmmũgãhã!'

¹⁸'Ãxop yãy xexka pe'ãpanõm, kopxix 'ãhak mõg hok. ¹⁹Topa 'ũgputup, 'ũ mõg, yã hãpxip kutõgnãg kopxik mõg, nũy nõm xop te hãpxopmã'ax yũmmũg. Ha' yĩy ka'ok, yãy xexka pe'ãpanõm tu! 'Ãpu hãpxopmã ka'ok kamah! ²⁰Topa te yãy yõg tikmũ'ũn xat, puyĩy yĩpkox pi' xe'e!, nũy hãpxopmã max. Tikmũ'ũn te hitop tu hãm'ãktux, tu hãpxopmã max hok, puxix tu yĩpkox 'ohnãg. ²¹Pi'yã' mũn xatep-tup? 'Ok 'ũgmõg, nũy xikot hã 'ãkix'ax? 'Ok pep-tup, 'ũyiy'ax pu'uk hã 'ãhittupmãhã? 'Piya' mũn xatep-tup? Yã xatep-tup 'ũg 'ãhittupmã', yĩy hãpxopmã max.

Tik te' nõy hã' xupxet

5 ¹Tikmũ'ũn te 'ãxop 'ãktux kummuk, yã 'ãxop 'ũm yõg tik 'ũm te' nõy hã' xupxet kummuk, yã' xonnix kummuk, ha tikmũ'ũn nõy te Topa hã' puknõg te' mĩy 'ohnãg. Yã tik te yãy tak xetut mũg, nũy nũ mütik 'ãnõm, tu hãpkummuk mĩy pax. ²Tep te xiy 'ãxop te yãy mũn max pe'ãpanõm? Yã 'ãkummuk! 'Ãpu yãyhãhup, nũy tik kummuk xupmã. ³'Ûyãk xihip nõmhã 'ãxop mütik! 'Ãte tik yõg hãpxopmã'ax kummuk kopit, 'ihã hãptox tuk xip, ha yũmũg xuxyã Yeyox Kunnix te 'ã' hõm yãy 'ãxet'ax, 'ãte tik hãpxopmã'ax kummuk kopit. ⁴'Ûyãk xihip 'ãxop mütik, 'ihã 'ãxop te yãy kotinnãhã', ha yũmũg xuxyã te 'ãka'ogãp-tup, ⁵xa tik kummuk hõm Hãmgãyãgnãg pu! Pũyã tu xok, pãyã Topa te' kuxa kummuk xit, pu' koxuk tu xip ka'ok, 'ihã yũmũg xuxyã Yeyox Kunnix nũn putpu!

⁶'Ãxop yãy mũn max pe'ãpaxex. 'Ap max'ah. Xate hãm hittap yõg hãm'ãktux yũmmũg, yiy: "Pãm yõg tokatogã'ax kutignãg te pãm xexkanãhã," kaxiy. ⁷Yã tokatogã'ax te hãpkummuk mĩy'ax putuk, yiy hãpkummuk mĩy kux, nũy tu max, tu pãm putuk'ax, pãm tokatok hok putuk, yã' tũmnãg. Hãpxip kutõgnãg 'ihã 'ũgmũ yõg Yoneo xop te 'ãmuk xexka 'ãxet'ax Nõãlyẽn mĩy putup, 'ihã kahnẽn putex, pu' xohix' mã! Ha Kunnix te yũmũ yõg kahnẽn xe'e!, tu mĩpkupnix tu' xok tap yũmũg pupi!, hu yũmũg hã kahnẽn xe'e! ⁸'Ãpu yũmũg Kunnix pekpaxeh, nõm te yũmũg pupi' xok pekpaxeh, yã 'ãmuk xexka Nõãlyẽn putuk, yiy yũmũ'ãte hãpkummuk mĩy kux, ha pãm yõg tokatogã hok putuk. Yã pãm te hãmyok mĩy'ax 'ãktux, xix hãmmaxnã'ax 'ãktux.

⁹'Ãte xa kax'ãmi tap, pu tikmũ'ũn kummuk mütik 'ãkotinnã hok, nõm tikmũ'ũn te' nõy hã' xupxet. ¹⁰'Ãxop te hãm xexka tu' pip, yiy hãpkummuk mĩy xop te xa yãy kote' pip. Yĩ' xohix tu 'ãxop 'ãxatat hok. Ha nõm kummuk xop te' nõy hã' xupxet, xi' nõy yõg hãpxop putup pax, xix hãpxopmã kummuk xix topa komut pu nũ' xup. ¹¹Pa tikmũ'ũn te yãy 'ãktux, tu' kuxa yũm ka'ok'ax 'ãktux, tu hãm'ãktux max, pãyã' nõy hã' xupxet kummuk, xi' xupkumiy, xix topa komut pu nũ'xup, xix kenmuk xo'op tu mõktu paptux, xi' nõy kupex, xix hãpxop hã' xupxet, puxix nõm tu 'ãxatat, nũy nũ mütik 'ãxit hok.

12-13 'Āte Topa hā' puknōg xop yōg hāpxopmā'ax kopit hok. Yā Topa mūn te' kopit putup. Pa 'āxop te yāy yōg hāpxopmā'ax kopit'ax. Yā' max xa' kopit. Topa yōg tappet te: "Tikmū'ūn kummuk xupmā', puyīy 'āxop mūtik tu ti hok," kaxīy.

Tikmū'ūn te' nōy kumīy kummuk

6 1 'Āxape te xa hāpkummugā', 'āpu 'āxape nōy ha mōg, 'āxape pa te hāmyūmmūg ha 'āmōg, pu 'ātix kopit. 'Āmōg hok Topa hā' puknōg xop hah, pu tu' kopit, pāyā 'āxape ha 'āmōg, tik kuxa yūm ka'ok Yeyox kopa ha 'āmōg. 2 'Ok yūmmūg hok xate'? Topa yōg tikmū'ūn te Topa hā' puknōg xop hāpxopmā'ax kopit putup. 'Ok 'āpa te hāmyūmmūg hok? 3 Yā yūmū'āte pexkox yōg nū'pok xop yōg hāpxopmā'ax kopit putup kamah, hu yāy xape yōg hāpxopmā'ax kopit'ax nōmhā, puyī' nōy hā tu xape 'ūxeheh. 4 'Āxape te 'ākte'ex kummuk, yā hāpxopmā'ax kutīgnāg, ha 'āxape kummugāp-tup 'ūyānān tu', puxix tik puknōg tu' xax hok, puyīy tu' kopit. Kaxīy hok. 5 'Ok yāyhāhup hok xate'? 'Ok 'āxop mūtik xip hok tik pa te hāmyūmmūg, puyīy 'ātix hu' kopit max? 6 Yā' xip! 'Āte' yūmmūg! Pa 'āxop gāy, tu' kuxa mām hok xop ha 'āmōg, nūy tu' xax, pu 'ōg hāpxopmā kummuk'ax kopit.

7 'Āxop yāytukmīy tik puknōg keppah, yā' kummuk. 'Ok xate hāmyūmmūg'ax xohix xaxok? 'Ūtux hok pu 'āxape 'ākummugā'. 'Ūtux hok pu 'āxape 'ōg hāpxop pa'. 8 Pa 'āxop te 'āxape pu kummugā pax, ha' nōy yānān tu 'ākummugā pax. 'Āhup! Puxi!' 'Āxop xape xop. 9-10 Tikmū'ūn kummuk te pexkox ha' mōg 'ohnāg, nōm xop Topa pu' yīpkox 'ohnāg, 'ap mōg putup'ah hāpkummuk mīy'ax xop xohix, nōm te' nōy hā' xupxet, xix nōm te topa komut pu nū'xup, xix nōm te' nōy xetut hā' xupxet, xi' nōy yīpxox hā' xupxet, xix nōm tik te tik nōy pēnā kummuk, xix 'ūn te 'ūn nōy pēnā kummuk xix nōm te hāpxop hā' xupxet, xix nōm xupkumīy, xix nōm te kenmuk xo'op tu mōktu paptux, xix nōm te' nōy kupex, xix nōm te hāpxopmā kummuk pax. 11 Hōmā 'āxop 'ūm te hāpxopmāhā kaxīy, pa Topa te 'ākuxa tupmāhā', xa 'ākuxa max, ha hōnhā 'āxop te Topa hā tikmū'ūn, yūmūg xuxyā Yeyox Kunnix hā 'āxop yā Topa yōg tikmū'ūn, xix Topa Koxuk hā 'āxop yā Topa yōg tikmū'ūn.

Topa tu hāpxopmā max

12 Pa tikmū'ūn 'ūm te hām'āktux'ax, hu: "Āte yāy putup'ax xohix mīy'ax," kaxīy. Hamūn. Pāyā yāy putup'ax mīy, puxix xa kummugā'ax. 'Āte hāpxopmā'ax xohix kamah, pa 'āte' tux hok, pu nō hāpxopmā'ax 'ūgkummugā hok. 13 Pa tikmū'ūn nōy te hām'āktux'ax, hu: "Topa te hāpxop xit'ax mīy pu tikmū'ūn mā', ha Topa te tikmū'ūn tex mīy, puyīy tikmū'ūn nō tu xit," kaxīy. Hamūn. Pa Topa te tikmū'ūn tex nōāp-tup, xi' xit'ax nōāp-tup kamah. Yā yūmūg yīn mīy, 'ūyīy yūmūg hāpxopmāhā yūmūg xuxyā tu', yūmūg yīn 'ūm mīy'ah, 'ūyīy yūmūg nōy hā' xupxet. 'Āmhok. Yā yūmūg yīn yā yūmūg xuxyā yōg. 14 Topa te yūmūg xuxyā putpu' hīnnāhā, hu yūmūg hīnnā'ax putpu kamah, 'ūka'ok tu'.

¹⁵Ok 'äxop te hämyümmüg hok? 'Äxop yã Kunnix hä 'äyïn puxet, Yä' kummuk xexka, xa Kunnix yög tik te xotit mütik 'änöm. Yä' xotit hä' yäyhä yïn puxet. Püyä Topa 'ätux hok, xayiy 'änöm hok! ¹⁶Ok 'äxop te hämyümmüg hok? Yä tik te xotit mütik nöm, puxix 'ün hä' yïn puxet, Topa yög tappet te: “Yä' tix te yäyhä' yïn puxet,” kaxiy. ¹⁷Pa tikmü'ün kuxa yüm ka'ok Yeyox kopah, puxix tu kuxap-xet yümüg xuxyã kuxa mütik.

¹⁸'üg'äpax, xayiy 'änöy hä 'äxupxet hok. Häpkummuk miy'ax nöy tikmü'ün yäy yïn kummugä'ah, pa tikmü'ün xonnix, puxix yäy yïn kummugä'. ¹⁹Ok 'äxop te hämyümmüg hok? Yä Topa Koxuk xip 'äkopah, ha Topa te nü'kutnähä', pu 'ämütik tu xip ka'ok, 'äxop yä yäy mün xat'ah, 'ämhok, yä Topa te yäy yög tikmü'ün xat. ²⁰Topa te 'äpop, tu häpxopmä ka'ok, nüy 'äkuxa tupmä', yä yäy kutok xok 'äxop pupi', nüy 'äkuxa tupmä', yiy häpkummuk miy hok, puyi' puknög xop pënä', tu: “Äxop yög Topa max, tu 'äka'ogähä', xayiy häpxopmä max!” kaxiy.

Tikmü'ün te yäyta'ax

7 ¹'Äxop te 'ä kax'ämi tappet tu, tu tappet tu yäy 'äktux, tuk yïkopit, tu: “Ok max tikmü'ün yäytax?” kaxiy. Yä' max pu yä tik yäytax hok, nüy yä' hok xip, ²pa tikmü'ün punethok te' nöy hä' xupxet, yiy 'äte: Yä' max tik yäy yög 'ün müy, pu 'ün kamah yäy yög tik müy. ³'Äte xe' xat, pu' yïpxox yäy xetut mütik tu nöm max, xi' xat, pu' xetut yäy yïpxox mütik tu nöm max. ⁴'Üxetut yïn yä' yïpxox yög yïn, yï' yïpxox te' xat, ha' yïpxox yïn yä' xetut yög yïn, yï' xetut te' xat. ⁵Xatix yäy mün höm, nüy 'ü nü mütik 'änöm, nüy 'äti ka'ok. Pa Topa pu häm'äktux pax, 'ihä 'äp-tox puxet xix 'äkuxap-xet, hu ta häpxip kutögnäg 'ihä 'ähok 'änom. Pa häm'äktux kux, 'ihä nü mütik 'änöm 'üxeheh, pu Hämgäyägñäg xatix kummugä hok, 'änöm putup hah.

⁶'Äxep xat'ah 'äte nömhä, päyã xa hämyümmügähä'. ⁷'Ätep-tup, pu tikmü'ün xohi' hok pi', 'ügputuk nüy, pa Topa te tikmü'ün xohix ka'ogähä', pu tu häpxopmä max, tu tik puxet ka'ogähä pu' hok xip, xi' nöy ka'ogähä pu yäyta max.

⁸Yiy 'äte' hok pip xop pu häm'äktux, puyi' hok pi', hu yäyta hok 'üg putuk nüy. Ha' hok mäm xop pu 'äte häm'äktux kamah, pu' hok mäm. ⁹Yäytap-tup te 'äp-tex, 'äpu yäytax. Yäyta'ax 'ümax, yäytap-tup xüy mün yä' kummuk, yä kuxap putuk 'äkopah.

¹⁰Ha 'äte tikmü'ün yäyta xop pu häm'äktux, yä yümüg xuxyã te' xat, pu tu yäy xatat hok. ¹¹Yäy xatat, puxi' hok xip, tu' nöy müg hok, tu möktu xe yäy yïpxox müg, xix yäy xetut müg, nüy nü mütik tu ti ka'ok 'üxeheh.

¹²Tikmü'ün nöy pu 'äte hämyümmügähä', 'ap Topa te' xat'ah. Tikmü'ün kuxa yüm ka'ok Kunnix kopah, ha 'ün müg, nöm kuxa yüm 'ohnäg, tu' yïpxox mütik tip-tup, puxix 'äti'. Püyä' xetut nïm hok. ¹³Ha 'ün nöy kuxa yüm ka'ok Kunnix kopah, tu tik müg, nöm kuxa yüm 'ohnäg, ha' yïpxox te nü mütik nöm putup, puxix 'äti'. Püyä' yïpxox nïm hok. ¹⁴Yä Topa te' yïpxox ha hämmxnä'ax, tu' xetut kuxa yüm'ax hä hämmxnä'ax, tu 'ün nöy ha hämmxnä'ax, 'üyïpxox kuxa yüm'ax hä' hämmxnä'ax, puyiy tuk-tok xohix hu Topa yög, ka Topa hä' puknög

xop putuk, nōm te Topa yūmmūg 'ohnāg. ¹⁵Pe' yīpxox kuxa yūm hok te' xetut nīm putup, pe' xetut kuxa yūm hok te' yīpxox nīm putup, pūyā 'ā' nīm, ha' kux. Pūyā' kuxa mām ka'ok xop pip. Yā Topa te yūmūg kuxa māmāhā, 'ūyīy nōy xop mūtik tu ti max. ¹⁶A xate hāmyūmmūg'ah, 'a 'ānōy kuxa yūmmūg'ah. 'Ok pe' kuxa yūm'ax Kunnix kopah, 'ok pe' kuxa yūm hok. Pūyā mōg, 'ūgmīy hok.

Topa pu' yīpkox xihip

¹⁷Pūyā tikmū'ūn xohix hāpxopmā max. Topa te' xānāhā', pu tu hāpxopmā max tikmū'ūn kopah. Pūyā tu pip ka'ok, nūy yāy yōg hāpxopmā'ax mīy. Yā 'āte tikmū'ūn kuxa mām xop xohix pu hāmyūmmūgāhā'. ¹⁸Tik te yāy nāg xax yīmap tu' xak tap, 'ihā Topa te' xānāhā', puxi' xak hok, nūy koex xut. Ha tik te yāy xax xak 'ohnāg 'ihā Topa te' xānāhā', puxi' xak hok, nūy xax xak hok. ¹⁹Yā' xax xak'ax, xi' xax xak hok, yā Topa pu yāy putuk, pa Topa yōg xat'ax pu 'īpkox pi', nūy hāpxopmā max. ²⁰Pūyā' xohix hāpxopmā max, Topa te' xānāhā', pu tu hāpxopma max tikmū'ūn kopah. Pūyā tu' pip ka'ok, nūy yāy yōg hāpxopmā'ax mīy. ²¹'Ok 'āhām 'āxat'ax pu, 'ihā Topa te 'āxānāhā'? 'Ok 'āhok hā 'āhām, tu tayūmak 'ūm pa hok? 'Ūxutigā hok, pa mōg'ax nūy 'ānōy pu 'āhām, nūy tayūmak pop, puxi mōy, tu' hām. ²²Yā yūmūg xuxyā te 'ākuxa kummuk xut, 'ihā 'āxānāhā', tu' xut, xa mōg, xayīy yūmūg xuxyā hā 'āptix, nūy nōm pu 'āyīpkox xihip. Kamah tik hām 'ūnōy pu', nūy tayūmak pop, yā kamah Kunnix hā 'ūptix, nūy yūmūg xuxyā pu' hām 'ūhok hā, nūy nōm pu' yīpkox xip. ²³Topa te yāy kutok nū'kutnāhā', pu 'āxop pupi tu xok. Yā yāy kutok yāp-xehnāg, ha Topa te mō'yāy xe'ēgnāg, pāyā nū'kutnāhā', pu 'āxop pupi tu xok, puyīy 'āxop hā 'āxuxyāp-xet. ²⁴Topa te 'āxānāhā', tu 'āyīmōgatux. 'Āpu pi ka'ok, nūy Topa pu 'āhām mō kuma mōg.

²⁵'Ūkxape xop: Xatek yīkopit, hu: "Ok max tikmū'ūn yāytax?" kaxīy. Topa tek xat'ah, 'ūyīy 'āte' hok pip xop pu hām'āktux, pāyā 'āte hāmp'e'paxex max, ha Topa tek kuxa ka', yīy 'āte nōm xop pu hāmyūmmūgā'ax. ²⁶Hōnhā' gāyxop te yūmūg xūyā punethok, yī' max, pu tu tik yāyta hok. ²⁷'Ok xate 'ūn mūg'ax, nūy yāytax? 'Āpu, yāyta! 'Ok yā' hok 'āxip? 'Āpu 'āhok xihip.

²⁸Yā' max pu' xetut mūy, yā hāpkummuk 'ohnāg. 'Ūn hok yūm yāytax, hu ta hāmmax mīy, pāyā' yāykuxop'ax punethok, ha 'āte 'āp-tup'ah, xa yāykuxop.

²⁹'Ūkxape: 'Āte xa hām'āktux, nūy xa hāmyūmmūgā'. Yā hāmyāxatamuk xohix yōg 'āmnīy xox putox, ha hāpxip kutōgnāg 'ihā tikmū'ūn xohix hok pip'ax putuk hāpxopmāp-tup, 'ok pe' yāytaha', 'ok pe' yāytahok. ³⁰Ha' kuxa hittup 'ohnāg xop te' kuxa hittup xop putuk'ax, xi' kuxa hittup xop te' kuxa hittup 'ohnāg xop putuk'ax, xix hāpxop pop xop te hāmhōgnāg pip xop putuk'ax, ³¹ha nōm xop te hāpxop hā' hām xop te' nōy xop putuk'ax, nōm xop te' yāykuxop 'ohnāg putuk'ax. Yā hāpxip kutōgnāg 'ihā hām xexka nōg putup.

³²'Āte 'āp-tup nōg, xa yāy kuxop, nūy hāpxop xak'ax tat. 'Ūhok pip xop te yūmūg xuxyā xak, nūy tu hām max, puyīy tu xuxyā kuxa hittupmā'.

³³Pa' yīpxox xop te hāpxop xak'ax tat, puyī' xetut kuxa hittupmā'. ³⁴Tu yūmūg xuxyā pu hāpxopmā kamah, yīp-tox tix, xi' kuxa tix. Ha' xetut

xop te yũmũg xuxyã pu hãpxopmãp-tup, yãp-tixix, pa' yĩpxox kuxa hittupmãp-tup kamah, hu yãykuxop, tup-tox tix, xi' kuxa tix.

³⁵ 'Áte 'ãxop hãk putup, nũy mō'ãnĩynãm, yĩy xa hãmyũmmũgãhã! 'A 'ãte 'ãkummugãp-tup'ah, pãyã 'ãp-tup, xa 'ãxop hãpxopmã max, nũy tu mãynãg mĩy, nũy 'ãkuxa hittup, nũy 'ap-tox puxet hã, xix 'ãkuxa 'ãkuxap-xet hã Topa xa tu hãm.

³⁶ Tik te yãyta'ax, pa yãyta hok pe'paxex, tu' xetut 'ap nãm yũmmũg'ah, tu' mũg putup, pũyã' mũy. 'Ap hãpkummuk 'ũm mĩy'ah. ³⁷ Pa tik te' hok xip putup tu yãy hok, tu' max pe'paxex, pu' xetut nĩm, nũy nũ mũtik nãm 'ohnãg, puxix yãyta hok, pãyã' hok xihip. ³⁸ Tik te' xetut xip tap mũg, nũy nũ mũtik yãytax, yã hãpxopmã max, pa tik te' mũg 'ohnãg, nũy yã' hok xip, yã hãpxopmã max xe'ẽgnãg.

³⁹ 'Ũn te' yĩpxox mũg, nũy nĩm hok, pa' yĩpxox xok, puxix tu kux. Yã' max. pu' nũy mũy, nũy xe yãytax, nũy nũy kuxa yũm ka'ok'ax mũtik yãytax. ⁴⁰ Pa 'ãte hãmp'e'paxex, hu: Yã' max xe'e, pu' hok tu xip ka'ok. Yã kaxiy Topa Koxuk te 'ã hãmyũmmũgãhã!

Tikmũ'ũn te xogyĩn hõm topa komut xop pu'

8 ¹ 'Áxop tek yĩkopit, hu: "Ok max, 'ũgmũg xit'ax xohix mã?" kaxiy. Yĩy 'ãte hãpxop xit'ax 'ãktux putup, tikmũ'ũn te' xit'ax hõm topa komut xop pu'. Tikmũ'ũn te hãpxe'e 'ãktux, hu: "Yũmũg xohix te hãmyũmmũg," kaxiy. Pa hãmyũmmũg'ax kutõgnãg te hãpkummugãhã, 'ĩhã tikmũ'ũn yãy mũn xexka pe'paxex, pãyã tikmũ'ũn te' nũy putup pax, tu' nũy ka'ogãhã, tu hãmyũmmũg xe'e! ² Tikmũ'ũn te yãy pe'paxex, hu: "Áte hãmyũmmũg!" kaxiy, puxix hãmyũmmũg 'ohnãg, ³ pa tikmũ'ũn te Topap-tup pax, puxix yã Topa te nãm yũmmũg.

⁴ 'Áte xa topa komut 'ãktux'ax. Yũmũ'ãte' yũmmũg. Topa komut xop 'ap xe'e'ah. Yã mō'ãmã'ax xop, Topa yãp-xehnãg xip pexkox tu', ⁵ pa Topa hã' puknõg xop te komut xop 'ãxet "topah", ha topa komut pip punethok, hãmnõgnõy tu' pip, xix hãm tu' pip, ha kamah tikmũ'ũn xuxyã punethok pip. ⁶ Pa yũmũ'ãte Topap-xehnãg yũmmũg, yã Kunnix hã mũnũn tu yũmũg 'Átak, tu hãpxop xohix mĩy, ha Topa tu yũmũg hi! Ha yũmũg xuxyã yãp-xet xip kamah, yã Yeyox Kunnix, tu hãpxop xohix mĩy kamah, yãy Tak mũtik, xi' hep xohix xop mĩy, hu yũmũg mĩy kamah.

⁷ Pãyã' kuxa mãm ka'ok xop yã xohix te' yũmmũg'ah, 'ũyãg te topa koumut xop pe'paxex tap, xix hõnhã pe'paxex kamah, tu hãpxop xit'ax pe'paxex, hu: "Yã tikmũ'ũn te nãm xit'ax hõm topa komut pu'," kaxiy. Tu' kuxa hittup 'ohnãg, tu' tux hok pu tu xit hok, 'ap xit'ax mãp-tup'ah. ⁸ Pa hãpxop xit'ax 'ũm te yũmũg kuxa tupmã 'ohnãg, pu Topa yũmmũg putup! 'Ãmhok. 'Ok pe' xit'ax mã, 'ok pe' xit'ax mã hok, puxix yũmũg kuxa kummugã 'ohnãg.

⁹ 'Õg pa 'ãti!, yãy putup'ax mĩy hok, ka xate 'ãxape pu'uk pu hãpkummugã', tu' mõgã kummuk, pu tu yãy pu hãpkummuk mĩy. ¹⁰ 'Áxape kuxa yũm pu'uk, ha' kuxa te' tux hok pu' xit'ax 'ũm mã hok, tu 'ãxit pẽnãhã, xate komut xop yõg xit'ax mãhã, puxix 'ãxape' mãp-tup, 'ĩhã' kuxa te' tux hok pu' mã hok. ¹¹ Ha Kunnix xok

'āxape pu'uk pupi!, pāyā 'āxape te Topa yōg putat xak, nūy 'āpe mōg, nūy 'āmūn pu' yīpkox xip, yīy ta 'ānōy mōgā kummuk, ¹²tu 'āxape kummugāhā, hu Kunnix pu hāpkummugāhā kamah, Kunnix te 'āxape pupi' xok hah. ¹³Yīy 'āte xogyīn mā hok, kak xape mōgā kummuk, pu tu yāy kuxa pu hāpkummuk mīy, 'ūkxit hah.

Yeyox te mō tik kutnāhā'

9 ¹Ok 'āte yāy xat hok? Yāk xat. 'Ok Yeyox Kunnix te nūgkutnā hok? Yā nūgkutnāhā'. 'Ok 'āte yūmūg xuxyā Yeyox pēnā hok? Yā' pēnāhā'. Yeyox pu 'āte hāpxopmāhā, 'ihā xa hām'āpak'ax max 'āktux, yīy 'ākuxa mām ka'ok yūmūg xuxyā kopah. ²Yeyox Kunnix te nūgkutnāhā, pāyā' kuxa mām xop nōy tek mūn pu' yīpkox 'ohnāg, ha 'āxop tek mūn pu 'āyīpkox pip, yā 'āmōg Topa yōg putat hā, ha tikmū'ūn xohix te' pēnāhā, hu hāmyūmmūg, yā yūmūg xuxyā te nūgkutnāhā, 'āte hām'āpak max'ax 'āktux.

³Tikmū'ūn tek kummuk 'āktux, kopxix yāy 'āktux, ⁴hu: 'Ok tux hok 'ā' hōm 'ūkxit'ax, xix xo'op'ax 'ūghām hah? ⁵Pax 'ūkxetut mūy, ha' kuxa mām ka'ok, 'ok 'āxop tek tux hok 'āte nōm mōgā, pu nū mūtik mōg, nūy hām'āpak max'ax 'āktux? Yā mō'pok xop nōy te' xetut xop mōgāhā, yā yūmūg xuxyā Yeyox taknōy xop te' mōgāhā, xix Pet kama te' xetut mōgāhā. ⁶Yā Maname xik mūn puxet hām, 'ūgmūg yīm hāk mūg hām, nūy xit, nūy tu pip'ax tu' pago. Yeyox yōg mō'pok xop nōy te' hok hā hāpxop pop, hāmyūmmūgā'ax tu' pop. ⁷Ok xonat 'ūm hām, 'ok yāy yīm hā' hām, nūy xit, nūy pip'ax tu' pago? 'Ap hām'ah! Yā gohet te' pago. Tikmū'ūn 'ūm te yāy yōg mīnta xut hok, nūy mā'? Yā' māhā'. 'Ūxohix te yāy yōg kup tu' xut mīnta, tu' māhā'. Maket 'ūm te' yōg mūnūytut hep xo'op hok? Yā' xo'op!

⁸'Ūxohix te' yūmmūg, yā hāpxopmā'ax max, pu yāy hām'ax hā tu xit, xix tu pet, yīy Mōyyex yōg xat'ax kamah yā hām'āktux, ⁹tu: "Mūnūytut tak yīkox hīy hok, puyī' xit hok, 'ihā' xuxnāg xetox xap mōy tu' tonnok. Pūyā' xux mā," kaxīy. 'Ok Topa te hām'āktux, tu mūnūytut tak putup pax'ax 'aktux? 'Āmhok. ¹⁰Pa yūmū'ā' xuktux, 'ūyīy yūmūg yāy hām'ax hā yūmūg xit, xix pet. Tikmū'ūn te hām'āpak max'ax 'āktux, puxix tik putuk, nōm te hāpxop xap xok, ha tikmū'ūn te hāmyūmmūgāhā, puxix tik putuk, nōm te hāpxop ta'ax nūnnāhā, yā' xohix te yāy hām'ax hā' xit, xi' pet. Kaxīy Maname xik mūn hām, nūy Topa yōg hām'āktux 'āktux. Yā' hām'ax xe'e! ¹¹'Ūgmū'āte xa hām'āpak max'ax 'āktux. 'Ok 'axop tek mū'ā ta nemēn hok, nūy hāpxop 'ūgmū'ā popmā 'ūyānān tu'? Yā 'āxop te ta nemēn. ¹²Yūmūg xuxyā yōg tik mō'pok xop te' hip, xa tu' popmā hāpxop. Yā' max, pa 'āxop tek mū'ā ta nemēn hāmāxap.

Pāyāk mū'āte xa tu' xak hā hām'hōgnāg, nūy 'āxop pu hupmā hok, nūy Topa puk mūg hām max. ¹³'Āxop te hāmyūmmūg. 'Āmānex xop te Topa pet xexka kopa' hām, tu Topa pet tu' xit'ax pop, nūy mā', ha tikmū'ūn te xokxop mō'hap, nūy Topa pu hāxyā', ha 'āmānex xop te xogyīn yāg paha', tu' māhā'. ¹⁴Ha kaxīy yūmūg xuxyā te' xat, pu' yōg kāmānat xop kama tu xit, tu yāy yōg hām'āx hā' xit, tu hām'āpak max'ax 'āktux hu hā' xit'ax pop hām'āpak xop tu'.

¹⁵Hāmyāxatamuk xohix hā 'āte hāmyūmmūgāhā', tu hāpxop 'ūm xak 'ohnāg, xak mū'ā pago, xix hōnhā 'āte 'a' xak'ah kamah. 'Ūyāk xok, pāyā hāpxop 'ūm xak 'āte putup'ah. 'A xak xet'ah 'āte'. ¹⁶Āte hām'āpak max'ax 'āktux pax, tuk hittup, pa' kummuk 'āte yā xexka pekpaxex, hām'āpak'ax 'āktux tu'. Yā 'āte ta nemēn Topa pu', nūy hām'āktux. 'Āte hām'āktux hok, puxix Topa 'ūgkummugā'. ¹⁷Yīy 'āte hām'āpak max'ax 'āktux putup pax, tu hāmmax hip kamah, pu yūmūg xuxyā 'ā hāmmaxnā'. 'Āte hām'āktux, Topa tek xat hah, yā Topa te 'ā' hōm 'ūghām'ax. ¹⁸'Ok Topa te 'ā' pagop-tup? Tu te pago hā xīy? Yāk kuxa hittupmāhā', nūy hām'āpak max'ax 'āktux, nūy hok hā' xuktux, kaxīy Topa te 'ā' pago, tuk kuxa hittupmāhā', ha 'āte' nōy yōg tayūmak xak 'ohnāg.

¹⁹Āte yāy xat, nūy Topa yōg hām'āktux'ax 'āktux, ha tikmū'ūn tek xat 'ohnāg! Pa tikmū'ūn xohix puk hām, tuk hok hāk hām, puyīy tikmū'ūn kuxa punethok mām ka'ok Yeyox Kunnix kopah. ²⁰'Ūkhām Yoneo xop mūtik, kopxix 'āte Yoneo xop yōg hāpxopmā'ax tat, puyī' kuxa mām ka'ok Yeyox Kunnix kopah. 'A Mōyyex yōg xat'ax tek xat'ah, pa Yoneo xop mūtik xip, 'ihā 'āte' xat'ax puk yīpkox xip, nūy Yoneo xop hāk xape'. ²¹'Ūkxip puknōg xop mūtik, kopxix 'āte Mōyyex yōg xat'ax xaxogāhā', puyīy puknōg xop kuxa mām ka'ok yūmūg xuxyā kopah. Pa Topa yōg xat'ax puk yīpkox xip, ha Kunnix yōg xat'ax tek xat xe'e'. ²²'Ūxip kuxa mām pu'uk xop mūtik, kopxix 'āte' yōg hāpxopmā'ax tat, nūy tu ka'ogā', puyī' kuxa mām ka'ok. Ha kaxīy 'āte' hep xop xohix yōg hāpxopmā'ax tat, nūy hāpxopmā'ax xohix hā tikmū'ūn 'ūm mōgā Topa yōg putat hā.

²³Āte hāpxopmā'ax xohix tat, nūy hām'āpak max'ax 'āktux, pu Topa 'ā hāmmaxnā'. ²⁴Tikmū'ūn mōg mō'ka'ok, ha' xohix mōg, pāyā yāp-xehnāg xupep tap, xi' yāg nōy xohix mōxa tu kunāy tu', pāyā' xohix mōg, puyī' mōxa tap. Ha kaxīy 'āxop mōg. ²⁵Ha tik xop mōg punethok, tu' xak, nūy tu xupep tap, tu' mōg mō'ka'ok, pa tik puxehnāg xupep tap, tu kānēy māynāg paha'. Pa hāmyāxatamuk xohix nōg 'ihā' kānēy yāykoxyōy, pāyā yūmū'āte mōxap-tup, tu pekkox tu mōxap-tup, 'ūyīy pekkox yōg hāpxop xe'ēgnāg pop, ha yāykoxyōy 'ohnāg. ²⁶Kaxīy 'āte hāpxopmā max, tu Topa Koxuk puk yīpkox xip, nūy hāmyok mīy. 'A 'āte hitop tu hāpxopmā'ah, pāyā māynāg hāpxopmāhā', tu Topa pu hāpxopmā max. ²⁷Āte yāy yōg putup'ax mīy'ah, nūy tu hāpxopmā max mōg kumak mōg, tuk kuxa teknōg 'ohnāg, 'ūyīy hām'āpak max'ax 'āktux kux, puyīy Topa te: "Xate hāpxopmā māynāg, mā', mōnāy, nūy 'ūgyīkāgnāg 'āxip ka'ok!" Kaxīy.

Topa komut pu nū'āxup hok

10 ¹'Ūkxape xop, 'āte hām'āktux putup, xayīy xaxok hok. Hōmā 'ūgmūg mōnāyxop hittap te Mōyyex pe' mōg, 'ihā hāpxexka 'Eyit tu nū'paha'. Hāmgyōy xexka te' xohix mō'nīy, tu kōnāg xexka 'Āta' xak. ²Tu hāmgyōy xexka kopa' pip, xix kōnāg xexka hā mōxakux, 'ihā Mōyyex pe' mōg, ³'Ūxohix te pekkox yōg hāpxop puxet māhā', ⁴tu pekkox yōg hep xo'op. Yā mīkaxxap xexka tu' xo'op, ha kaxīy Kunnix tu' xo'opmāhā', tu Kunnix mūtik mōg putat tox hā. ⁵Pa tikmū'ūn punethok te Topa gāyāhā', hu' xakix hām panip xexka tu'.

⁶Ha Topa te' xat, pu tik tappet mīy, nūy yūmū'ā hāpxopmā'ax xohix yūmmūgā', 'ūyīy yūmūg hāpxop hitop xak hok. ⁷Āpu topa komut xop pu nū'āktettex hok, nūy Topa xe'ēgnāg nīm hok. Yā Topa yōg tappet te tikmū'ūn hittap 'āktux, tu: "Tikmū'ūn mām, nūy xit, nūy xo'op, tu' yok, nūy hāmyā' topa komut xop pu'," kaxīy. ⁸Āpu yūmūg xonnix hok, yā tikmū'ūn hittap xonnix punethok, yī' yāg xohix te 23.000 xakix, 'āmnīy puxet 'ihā' xakix. ⁹Āpu yūmū'āte Topa gāyā hok, hāpkummuk mīy tu'. Yā tikmū'ūn hittap te' gāyāhā', tu hāpkummuk mīy pax, yīy kāyā gāy te' kix. ¹⁰Yā tikmū'ūn hittap te Topa gāyāhā', yīy pexkox yōg mō'kutnā'ax te' kix, yā mō'kutnā'ax 'āxet'ax 'Ūxok'ax.

¹¹Ha tappet mīy, nūy yūmū'ā' yūmmūgā', 'ūyīy tikmū'ūn hittap putuk hok. Yā hōnhā hāmyāxatamuk xohix ka'ax, tu' xox putox.

¹²'Ōg pa 'āti'. 'Ākuxānōg, Topa tu' xax, pu mō'āniynām, xayīy hāpkummuk mīy hok. ¹³'Āxop te hāpkummuk mīy putup, yāy yōg putup'ax kummuk tu' mīy, ha kaxīy tikmū'ūn xohix te hāpkummuk mīy putup, pa Topa te xa hām'āktux xex, tu 'āka'ogā'ax, xayīy hāpkummuk mīy hok, yīy Topa tu' xax, hu: Topah, mōknīynām, 'ūyīy hāpkummuk mīy hok!" kaxīy, ha Topa te 'āka'ogāp-tup.

¹⁴'Āxop tek mūn hā 'ūg 'āxape xop, hu 'ōg pa 'āti', pu topa komut pu nū'āk-tettex hok. ¹⁵'Āte xa hām'āktux, 'āxop te hāmyūmmūg hah, hu yōgnū hām'āktux kopit max, 'ūyīy 'āxop yūmmūgā'. Yā Topa yōg hām'āktux xe'e'. ¹⁶Hōmā Kunnix te tik xop pu' hōm kānēy, ha mīnta hep xupyāg 'ūkopa' xup, ha yūmūg xat, 'ū yūmūg xupyāg xo'op kamah, pu yūmū'ā ha hāmmaxnā', yīy yūmū'āte kamah kānēy hā' xo'op, tu Topa pu: "Āmax Topah. Xate yūmū'ā xupyāg xe'e' hōm, tu pexkox yōg xupyāg xe'e' hōm. Puxi'," kaxīy. 'Ok hāmyūmmūg hok, xate'? Xate xupyāg xo'op, hu ta 'āxape xop xohix mūtik xo'op, nūy yūmūg xohix pe'āpaxex, ha yūmūg xuxyā xok, mīpkupnix tu' xok, tu yāy hep 'āta nū'nāhā', nūy yūmū'ā ha hāmmaxnā'. Ha yūmū'āte pām koxip, nūy yūmūg xape xop mūtik mā', nūy yūmūg xuxyā pekpaxex. Yā yūmūg xuxyā te mīpkupnix tu' xūy, nūy yūmū'ā hāmmaxnā'. ¹⁷Yā pām puxet, ha' xohix te' māhā', yīy Kunnix hā yūmūg yīn puxet kamah, yā yūmūg kuxap-xet Kunnix kuxa mūtik.

¹⁸Yoneo yōg tikmū'ūn pe'āpaxeh. Tu Topa pet kopa' xit'ax māhā', 'ihā' āmānex te mō'hap, nūy Topa pu' haxyā'. ¹⁹'Ātep-tep 'āktux putup? 'Ok topa komut ka'ok? 'Ap ka'ok'ah, yā' hitop. 'Ok hāpxop xit'ax ka'ok, tikmū'ūn te nōm topa komut xop pu' hōm? Yāmhok! ²⁰'Ap ka'ok'ah. Pa tikmū'ūn te nōm xit'ax hōm yāmīy kummuk pu', 'ihā komut xop pu' hōm, 'ap Topa pu' hōm'ah. 'Ātep-tup'ah, xa yāmīy kummuk yōg hāpxop pop. ²¹'Āxop te Topa yōg kānēy hā' xo'op, nūy yūmūg xuxyā pe'āpaxex. 'Āpu yāmīy kummuk yōg kānēy hā xo'op hok. 'Āxop te Topa yōg hāpxop māhā', nūy yūmūg xuxyā pe'āpaxex. 'Āpu yāmīy yōg hāpxop mā hok. ²²'Ok yūmū'āte Topa gāyāp-tup? 'Ākuxānōg! Paxip! Topa ka'ok, ha ta yūmūg pu'uk.

'Ānōy yōg putup'ax mīy

²³Tikmū'ūn 'ūm te: “Yūmū'āte yāy putup mīy'ax,” kaxīy. Mōy mīy, pāyā' mīy'ax 'ūm te xa hāpkummugā'ax. Ha xe: “Yūmū'āte yāy putup mīy'ax,” kaxīy. Hamūn. Pa xate' mīy'ax 'ūm 'ūhitop tu' mīy. ²⁴Yāy putup'ax mīy hok, pa 'ānōy putup'ax mīy, nūy nōm kuxa hittupmā'.

²⁵'Ākuxa te yāy tux hok xa xogyīn mā', 'āpu, xogyīn xohix mā', tu' nōy yīkopit hok. ²⁶Yā Topa yōg tappet te: “Hām xexka yā Topa yōg, xix hāpxop xohix 'ūyōg kamah,” kaxīy.

²⁷Tikmū'ūn kuxa mām hok te 'āxānāhā xa 'āxit, 'āmōg putup, nūy mōg, nūy hāpxop xohix mā', hu 'ānōy yīkopit hok, ka 'ākuxa 'ākupex, hu 'āhittup 'ohnāg. ²⁸Pa tikmū'ūn 'ūm te: “Nāy! 'Ūmā hok! Yā topa komut xop pu' hōm tap!” kaxīy, 'āpu' mā hok, ka 'ākuxa 'ākupex, hu' hittup 'ohnāg, ²⁹xayīy 'ānōy pu hāpkummugā hok.

Ha tikmū'ūn 'ūm te: “Tep tu 'ātek nōy pekpaxex, nūy xogyīn mā hok? Tep tuk yāy putup'ax mīy hok?” ³⁰Nāy, 'āte Topa pu hām'āktux hāmāxap, hu: “'Āmax Topah. Yā xate 'ā' hōm hāpxop,” kaxīy, tuk-nāy tuk xit. Tep tu tikmū'ūn te 'ā xuktux kummuk? Yā Topa te 'ā' hōm xit'ax 'ūg 'ūmā,” kaxīy.

³¹Hāpxopmā max, nūy Topa kuxa hittupmā', pe 'āxop xit, peyā' xo'op, pe' yā hāpxopmā', nūy ta Topa pu: “'Āmax Topah. Xate 'ā' hōm hāpxop max punethok. Puxi!” kaxīy. ³²'Āpu hāpxopmā max, nūy Yoneo xop pu hāpkummugā hok, nūy puknōg xop pu hāpkummugā hok, nūy ta' kuxa mām ka'ok xop pu hāpkummugā hok. ³³'Āpu hāpxopmā', nūy yōgnū hāpxopmā'ax tat. 'Āte' xak, nūy xohix kuxa hittupmā', 'ap yāy pekpaxex'ah, pak xape xop pekpaxex, 'ūyī' xohix mōgā Topa yōg putat hā.

11 ¹'Āpu yōgnū hāpxopmā'ax tat. Yā kaxīy 'āte Kunnix yōg hāpxopmā'ax tat.

'Ūn xop te 'āmūtik kotīnnāhā'

²'Āte xa hām'āktux max, xate yōg hām'āktux xaxok 'ohnāg hah, tu 'ā yīpkox pip. ³Pa 'āte 'āp-tup, xa hāmyūmmūg. Yā Kunnix te' yīpxox xat, ha' yīpxox te yāy xetut xat, ha Topa te Kunnix xat. ⁴'Ap max'ah, pu tik xop kuxxax tat, nūy nō yāykotīnnā' pip, nūy Topa pu hām'āktux, xix Topa pupi hām'āktux 'āxape xop pu! 'A Kunnix tep putup'ah kaxīy. ⁵⁻⁶Pa 'ūn xop tep-tox mō'nīy, puxix tu max. Kunnix tep putup. 'Ūtux hok pu 'ūn tep-tox mō'nīy, nūy yāykotīnnā' pip, nūy Topa pu hām'āktux, xix Topa pupi hām'āktux 'āxape xop pu! 'A Kunnix tep putup'ah, 'īhā 'ūn tep-tox mō'nīy hok, tu 'ūn nōy putuk, nōm te' xe mōy. Pūyāp-tox mō'nīy, nūy yāyhāhup hok. ⁷Tik xop tep-tox mō'nīy hok. Yā Topa te' nōy yāy putuk ha' mīy, pu Topa kuxa hittupmā', ha 'ūn te tik kuxa hittupmāhā'. ⁸Topa te tik mīy hāmāxap, tuk-nāy tu tik kup tu' xut, nūy 'ūxetut mīy. ⁹'Ap Topa te tik mīy'ah, puyī' xetut hā tu tehe! 'Āmhok. pa 'ūn mīy, puyīy tik hā tu tehe! ¹⁰Yīy 'ūn xop tep-tox mō'nīy pexkox yōg nū'pok xop hah, nūy pēnā', nūy hāmyūmmūg. Yā' xetut te yāy yīpxox pu' yīpkox

pip. ¹¹Topa yōg putat hã tihik xix 'ũhũn te mō'yāy nĩynãm. ¹²Topa te tik tu' kup xut, nũy 'ũn mĩy, ha kama tik te 'ũn tu' nãhã'. Yã Topa te hãpxopmã xohix.

¹³'Apu 'ãxop te' kopit: 'Ok max, 'ũn putox mō'nĩy hok, nũy yãkotĩnnãhã' pi', nũy Topa pu hãm'ãktux? ¹⁴Tik mũn xe tox pu kummuk, yã Topa yōg tikmũ'ũn te' yũmmũg, ¹⁵pa 'ũn mũn xe tox pu max, tup-tox mō'nĩy. ¹⁶Tikmũ'ũn 'ũm te hãm'ãktux putup yãnãn tu', tu xe tox 'ãktux putup, koxix 'ãte tu xe hãm'ãktux, hu: 'Ûgmũ'ãte' xat, xi' kuxa mãm xop xohix te' xat, pu 'ũn xop tup-tox mō'nĩy, nũy yãykotĩnnã' pi', nũy Topa pu hãm'ãktux.

Yũmũg xuxyã yōg xit'ax

¹⁷Hõnhã 'ãte xa hãmyũmmũg'ax nõy 'ãktux, 'ãxop te hãpxopmã kummuk hah. 'ãxop te yãy tu nũ'ãnãhã', tu yãy kummugãhã'. ¹⁸Tikmũ'ũn te 'ã hãm'ãktux, tu 'ãxop 'ãktux, ha 'ãxop yãy tuk-mĩy pax, 'ĩhã yãy tu nũ'ãnãhã', nũy Topa pu hãm'ãktux, hak kuxa yũm kutõgnãg nõm hãm'ãktux kopah.

¹⁹Yã' max 'ãxop yãyxatat kutõgnãg, pu hãpxopmã'ax max xop tu mũg.

²⁰'ãxop yãy tu nũ'ãnãhã', nũy xit, nũy yũmũg xuxyã pe'ãpaxex, pu, 'ãxit hok. ²¹Yã 'ũyãg xit mō'ka'ok, nũy 'ũhi mō'ka'ok, ha' yãg putup xũy, ha' yãg nõy paptux. ²²'Ok yã 'ãpet 'ũm yũm hok, hu ta xit xix xo'op, nũy 'ãhi'? Kaxĩy 'ãxop te' kuxa mãm ka'ok xop putup hok, xi' hok xop pu' hupmãhã'. Xatep tep pe'ãpaxex? 'Ok hãpxopmã'ax max nõ'õm? 'Ap max'ah! Yã' kummuk!

²³Yũmũg xuxyã te 'ã hãmyũmmũgãhã', ha xa' yũmmũgã'ax, hu: Yũmũg xuxyã Yeyox te yãy yōg tik xop mũtik xit 'ãmñĩy hã, ha tikmũ'ũn gãy te' mũg'ax, nũy tup-tex, yĩy pãm pa' tap, ²⁴tu Topa pu: "ãmax Topah. Tuk mũ'ã' hõm 'ãxit'ax max. Puxi!" kaxĩy. Tu pãm koxip, tu: "Nũhũ 'ũgyĩn, yãk xok 'ãxop pupi'. 'Ûg pa', nũy mã', huk xaxok hok," kaxĩy. ²⁵'Ûxit kux, 'ĩhã yũmũg xuxyã te kãnëy pa', tu: "Topa te' pa'ax tup mĩy tikmũ'ũn mũtik, tuk yĩn hep 'ãta hã' pa'ax mĩy, 'ũkxok tu'. 'ãte yãy hep 'ãta nũ'nãp-tup, nũy pa'ax tup mĩy. Kãnëy pa', nũy tu' xo'op, 'ĩhãk mũn pe'ãpaxex, nũy huk xaxok hok," kaxĩy. ²⁶'ãxop te pãm mãhã', xix kãnëy tu' xo'op, puxix yũmũg xuxyã xok'ax 'ãktux pax, ha mõktu putpu' nũn.

²⁷Tikmũ'ũn kuxa kummuk te nõm pãm mãhã', xix nõm xupyãg xo'op, puxix Topa gãy, yũmũg xuxyã pe'paxex 'ohnãg hah, yĩy Topa te' kummugãp-tup 'ũyãnãn tu'. ²⁸Yãy kuxa yĩkopit hãmãxap, nũy yãy yōg hãpxopmã'ax yũmmũg, nũy kunãy tu pãm mã', xix kãnëy hã' xo'op. ²⁹Tikmũ'ũn xit, xix xo'op, tu hãmpe'paxex 'ohnãg, tu yũmũg xuxyã pe'paxex hok, puxix Topa gãy, nũy tu' xũyãgã'. Yã yũmũg xuxyã xok yũmũg pupi', nũy yũmũg kuxa kummuk xit.

³⁰Tikmũ'ũn punethok te hãmpe'paxex 'ohnãg, hu' pakut, xi' pu'uk, ha tikmũ'ũn 'ũm xakix tap. ³¹Tikmũ'ũn te yãy kuxa yĩkopit hãmãxap, nũy yãy hãpxopmã'ax yũmmũg, puyĩy Topa 'ũkuxa maxnã', puxix Topa' xũyãgã hok. ³²Pa Topa te yũmũ yōg hãpxopmã'ax kopit, nũy tu' yũmmũg, tu yũmũg xũyãgãhã', 'ũyĩy Topa yōg putat xak hok, nũy Hãmgãynãgnãg pet hã yũmũg mōg hok Topa hã' puknõg xop mũtik.

³³Āxop yāytu nū'ānāhā', nūy Topa yōg xit'ax mā', nūy yūmūg xuxyā pe'āpaxex, 'āpu 'āxape xop hip. ³⁴Putup te 'āp-tex, yīy ta yāy pet tu 'āxit hāmāxap, tuk-nāy tu 'āxape xop mūtik yāy kotīnnāhā', pu Topa 'āxop xūyā hok, 'āxop te hāpkummuk mīy hah. Ha hāpxopmā'ax nōy 'āte' kopit putup, 'īhā 'āxop mūtik 'ūkxip.

Topa Koxuk te tikmū'ūn ka'ogā'ax

12 ¹Ūkxape xop, 'āte 'āp-tup, xa 'āxop hāmyūmmūg max, nūy Topa Koxuk yā tikmū'ūn ka'ogā yūmmūg, ha' kuxa mām ka'ok xop ka'ogāhā', puyīy hāpxopmā max. ²Āxop te 'ōg hāpxopmā'ax hittap yūmmūg, 'īhā Topa hā 'āpuknōg, ha topa komut xop yīy hok te 'āxat, tu 'āmōgā kummuk. ³Yīy 'āte xa hāmyūmmūgāhā. Tikmū'ūn 'ūm te: “Pūyā Topa Yeyox pu hāpkummugā,” kaxīy, yā Topa Koxuk te' ka'ogā 'ohnāg, pu tu hām'āktux kummuk. 'Āmhok. Ha tikmū'ūn 'ūm te: “Yeyox yā yūmūg xuxyā!” kaxīy, yā Topa Koxuk te' ka'ogāhā', pu tu hāpxe'e 'āktux.

⁴Topa Koxuk te tikmū'ūn ka'ogāhā', pu hāpxopmā max punethok, tup-xehnāg te' ka'ogāhā', pu tu hāpxopmā'. ⁵Ha yūmū'āte hāpxopmā punethok, nūy yūmūg xuxyā tu hāpxopmā', yā yūmūg xuxyāp-xet puk hām. ⁶Ha tikmū'ūn 'ūm ka'ogāhā', pu tu hāpxopmā', tu' nōy ka'ogāhā', pu tu hāpxopmā nōy, ha Topap-xet te' xohix ka'ogāhā', pu tu hāpxopmā'. ⁷Topa te' kuxa mām xop xohix ha hāmmaxnāhā', tu' xohix tu' mūg. Yā Topa Koxuk te' kuxa mām ka'ok xop xohix kopa' xip, ha Topa te' xip'ax tu' mūg, puyī' xohix pēnā'. ⁸Topa Koxuk te tikmū'ūn 'ūm ka'ogāhā', puyīy' nōy mō'nīynām hām'āktux hā, xi' nōy ka'ogāhā', puyī' nōy hāmyūmmūgā', ⁹xi' nōy ka'ogāhā', puyīy kuxa yūm ka'ok, xi' nōy ka'ogāhā', puyīy nōy pakut hittupmā ¹⁰xi' nōy ka'ogāhā', puyīy hāpxopmā ka'ok xe'ēgnāg, yā tikmū'ūn puxet te' mīy hok, xi' nōy ka'ogāhā', puyīy Topa pupi hām'āktux, xi' nōy ka'ogāhā', puyīy hāmyūmmūg, nūy Topa Koxuk yōg hāpxopmā'ax yūmmūg, nūy 'ūkoxuk puknōg yōg hāpxopmā'ax yūmmūg kamah, xi' nōy ka'ogāhā', puyī' yīy'ax puknōg hā hām'āktux, xi' nōy ka'ogāhā', puyīy nō hām'āktux puknōg yūmmūgā'. ¹¹Yā Topa Koxuk puxet, tu' kuxa mām xop xohix ka'ogāhā', tup-tup, hu tikmū'ūn ka'ogā'ax pu hāpxopmā punethok.

Kunnix hā 'āyīn puxet

¹²Tikmū'ūn yīn puxet, tu' kup punethok pip, ha' māg te' yīn kopa' pip punethok, xi' kuxa, xi' tex, yā' xohix, hā kaxīy yūmūg xohix, tu Kunnix hāx yīn puxet. ¹³Yā yūmūg xohip-tox pix, Topa Koxuk te yūmūg putox pix, nūy Kunnix hā yūmūg yīn puxet. Yā yūmūg xohix, 'ok pe Yoneo xop, 'ok pe' puknōg xop, 'ok pe tayūmak pop tu yūmūg hām, 'ok pe' xuxyā xat'ax pu yūmūg hok hā' hām, yā yūmūg xohix te Kunnix hā' yīn puxet. Ha Topa Koxuk te yūmūg xohix kopa' xip, yīy yūmūg kuxap-xet Yeyox Kunnix kuxa mūtik.

¹⁴Ha' yīn kup puxet'ah. 'Āmhok. Yā' kup punethok. ¹⁵Pax pu' pata yīy, tu hām'āktux, hu: "Akmūn te yāk yīm'ah, huk yīn yōg 'ohnāg," kaxīy. Puxi' yā' yīn yōg xe'e!. ¹⁶Pax pu' yīpkox yīy, tu: "Ak pa'ah, huk mūn yīn yōg 'ohnāg," kaxīy. Pāyā yā' yīn yōg xe'e!. ¹⁷Pax pu' pa puxet xip 'ūyīn kopah, puxix hām'āpak 'ohnāg. Pax pu' yīpkox puxet xip 'ūyīn kopah, puxix tu' hax 'ohnāg. ¹⁸Yīy Topa te tikmū'ūn mīy, tu' yīn mīy, ha' kup punethok, xi' māg punethok, 'ūp-tup ha' mīy. ¹⁹Pax pu' kuxap-xehnāg xip, puxix tu kuxap-xet, 'ap yīn'ah. 'Āmhok. ²⁰Yā' kopa' pip xop xohix hā' yīn puxet.

²¹Pax pu tikmū'ūn pa yīy, nūy tu' yīm pu hām'āktux, hu: "Mōg, 'āte 'āp-tupnōg," kaxīy. Yā' kummuk, 'ūhitop tu' xuktux. Ha kaxīy 'āxop yā 'ākuxa mām ka'ok xop, tu Kunnix hā 'āyīn puxet, tu 'āxape xupmā hok. ²²'Āmhok. 'Ūyīm xut, puxi' yīn tu pu'uk, ha kaxīy 'āxop yāy xape xut hok, ka 'āxop 'āpu'uk kamah. ²³Tikmū'ūn te yāy yīn mō'nīy, 'ūyāg mō'nīy, nūy nō xex max, ²⁴tu mō' yāg nōy nīy 'ohnāg. Hā kaxīy Topa te tikmū'ūn yīn xohix mīy, ha' xohix max, ²⁵ha' yāyxatat 'ohnāg, yīy yāy hā tu tehet. ²⁶'Ūyīn yāg xūy, puxix tu yīn xohix xūy kamah. 'Ūyīn yāg tap, puxix tu yīn xohix tap. 'Ūkuxa mām ka'ok xop te tikmū'ūn yīn putuk, 'ūyāg xūy, ha' nōy xop xohix hittup 'ohnāg.

²⁷'Āxop te Kunnix hā 'āyīn, yā 'āxohix te Kunnix hā 'āyīn yāg. ²⁸Topa te hāpxopmā māynāg 'ūkuxa mām ka'ok xop kopah, tu tik xop mō'pok hāmāxap, hak-nāy tu tik xop nōy te Topa pupi hām'āktux, hak-nāy tu tik xop nōy te hāmyūmmūgāhā', hak-nāy tu tik xop nōy te hāpxopmā ka'ok xe'ēgnāg, ha tikmū'ūn puxet te' mīy hok, hak-nāy tu tik xop nōy te' pakut xop hittupmāhā', xi' nōy xop te' nōy hā tu' tehet, xi' nōy xop te' nōy xat, xi' nōy xop te' yīy'ax puknōg hā' yīy. ²⁹'A' xohix mō'pok'ah, 'a' xohix te Topa pupi hām'āktux'ah, 'a' xohix te hāmyūmmūgā'ah, xix 'a hāpxopmā ka'ok'ah. ³⁰'A' xohix te' pakut'ax hittupmā'ah, xi' yīy'ax puknōg hā' yīy'ah, xi' nōy pu 'a' yīy'ax 'ūm yūmmūgā'ah. ³¹Yīy Topa tu' xax, pu 'āka'ogā', xayīy 'ānōy ka'ogā' 'ūyānān tu'.

Pāyā 'āte xa' mūg putup putat xe'ēgnāg.

'Ānōy putup pax

13 ¹Pax tikmū'ūn yīy'ax hāk yīy, xix pexkox yōg nū'pok xop yīy'ax hāk yīy, pāyā 'ātek nōy putup pax hok, kopxi' hitop tuk yīy, yāk yīy'ax te 'āmānex te xap kāyā'ax putuk, yā' kax ka'ok, pāyā hitop hā' kax, tu' nōy yūmmūgā' 'ohnāg. ²Pax 'āte Topa pupi hām'āktux, xix hāmyūmmūg xexka', xix hām'āktux xe'e yūmmūg, xix kuxa yūm 'ūm ka'ognāg, nūy yīktix xut hām tu', pap-tup pax hok, kopxi' hitop hā hāpxopmā'. ³Pax 'āte yāy yōg hāpxop xohix popmā', xix yāy yīn hōm pu mō'hap, nūy Topa pu haxyā', pa 'ātep-tup pax hok, kopxi' hitop hā hāpxopmā'.

⁴Tikmū'ūn te' nōy putup pax, puxi' hip, tu nōā' tot, tu' nōy kuxa ka'. 'Ap yīpkumīy'ah, tu yāy mūn kutōgnāg pe'paxex, 'a yāy mūn xexka 'āktux'ah, ⁵tu' yīy pu'uk, nūy tu' nōy gāyā hok, 'ap yāy mūn te māxap pe'paxex'ah, 'ap gāy'ah, 'a' nōy yōg hāpkummuk mīy'ax xutigā'ah, pāyā'

xaxogāhā'. ⁶Tikmū'ūn te' nōy putup pax, puxi' nōy hāpkohe' mīy hā tu hittup hok, pāyā hāmyok mīy'ax hā' hittup. ⁷Ap kuxa teknōg'ah, pāyā nōā'tot, 'ūkuxa yūm ka'ok tu', tu hāmmax hip, puyīy Topa hāpxopmā'.

⁸Tup-tup pax, tup-tup kux 'ohnāg. Hōnhā tikmū'ūn te Topa pupi hām'āktux, tu' xuktux kux putup. Ha' yīy'ax puknōg hā tikmū'ūn yīy, pāyā' kux putup kamah. Ha hāmyūmmūg, pāyā' xaxogāp-tup kamah. ⁹Ūgmū'āte hāmyūmmūg kutōgnāg, ha tikmū'ūn te Topa pupi hām'āktux kutōgnāg kamah, ¹⁰pa 'āmnīy 'ūm mō'nā'ax, 'ihā yūmūg xuxyā nūn, 'ihā' xexka xe'ēgnāg tu' nūn, ha Topa Koxuk te tikmū'ūn ka'ogā'ax kux putup, yūmū'āte yāyhā ka'ok hah, ha hāpxopmā'ax hittap yāyxaxogāp-tup.

¹¹Hōmāk kutīgnāg, yāk mūn hā kaxxop, tu hām'āktux, tu kaxxop putuk, xix 'āte hāmpkxax tu kaxxop putuk, pāyā hōnhāk xip tap, hu 'āte kaxxop yōg hāpxopmā putuk 'a mīy'ah. ¹²Hōnhā yūmū'āte yāy pa pēnā'ax hā yāy pa pēnāhā', tu' pēnā kummuk, pa 'āmnīy 'ūm mō'nāp-tup, 'ihā yūmū'āte Topa pa pēnā max, 'ūyīkagnāg hā' tihi tu'. Hōnhā yūmūg'āte Topa yūmmūg kutōgnāg, pa 'āmnīy 'ūm mō'nāp-tup, ha 'āte Topa yūmmūg maxp-tup, yā kaxīy hā Topa tek yūmmūg.

¹³Hōnhā yūmūg kuxa mām ka'ok Yeyox Kunnix kopah. Yā hāpxopmā'ax max. Xix yūmū'āte hāmmax hip, tu Kunnix putpu' nūn'ax hip, nūy yūmūg mōg pexkox hah. Yā hāpxopmā'ax max kamah. Xix yūmūg yāy putup pax, tu' kux 'ohnāg. Yā hāpxopmā max'ax xe'ēgnāg.

Topa Koxuk te tikmū'ūn ka'ogāhā'

14 ¹Ūmax, ta' nōy putup pax. 'Āpu 'ānōy putup pax xexka'. Topa tu' xax pu pexkox yōg hāpxop popmā xa'. Yā' max xe'e', pu Topa pupi hām'āktux. ²Ūyīy'ax puknōg hā tikmū'ūn yīy, puxix Topa tu hām'āktux, pāyā tikmū'ūn 'ūm pu hām'āktux'ah, 'ūyīy'ax yā' puknōg hah, ha Topa Koxuk te' ka'ogāhā', pu Topa yōg hām'āktux xe'e' āktux. ³Pa tikmū'ūn te Topa pupi hām'āktux, puxix tikmū'ūn pu' xuktux, tu mō'nīynām, tu nō teheh. ⁴Tikmū'ūn yīy, 'ūyīy'ax puknōg hā' yīy, puxix mō yāy nīynām, pāyā tikmū'ūn te Topa pupi hām'āktux, puxi' kuxa mām ka'ok xop xohix mō'nīynām.

⁵Āte 'āp-tup, xa yīy'ax puknōg hā 'āyīy, pāyā 'āte 'āp-tup xexka', xa Topa pupi hām'āktux, nūy 'ānōy xop ka'ogā', ha' nōy te yāy mūn puxet ka'okgāhā'. Yā' yīy'ax puknōg hā hām'āktux. Pāyā tikmū'ūn xip, nūy nōy pu hāmyūmmūgā', puxi' yīy'ax puknōg yōg hām'āktux yūmmūgā', nūy hām'āktux'ax hā' nōy ka'ogā'. ⁶Ūkxape, 'āhāk mōg, tu' yīy'ax puknōg hāk yīy, kopxix mō'ānīynām 'okpa Topa yōg hām'āktux xe'e' āktux. Pāyā 'āte xa hāmyūmmūgāhā', 'ihā tikmū'ūn yāy yīy'ax hā 'āte Topa pupi hām'āktux, tu xa' xuktux, kopxix mō'ānīynām xe'ē'.

⁷Ūg'āpax, xayīy hāmyūmmūg. Tikmū'ūn kutex, ha kama hāpxop kāyā'ax pip punethok. Tik kāyā kummuk, puxix tikmū'ūn kutex yūmmūg 'ohnāg. ⁸Tik 'ūm te kāyā'ax, mīxux xop tut hā kāyāhā', nūy xonat xop xānā', tu kāyā kummuk, puxix xonat te hām'āpak, pāyā hāmyūmmūg 'ohnāg, 'ok yāy'ax, 'ok pe' xit'ax. ⁹Ha kaxīy 'āxop te hāpxopmāhā'. Tikmū'ūn te' yīy'ax puknōg hā' yīy, puxi' nōy te

hām'āktux 'ūm yūmmūg'ah, 'ūpuknōg hah, ha hām'āktux yāyxaxogā'ax. ¹⁰Hām xexka yōg yīy'ax xohix punethok, ha' yīy'ax xohix hā' hep nōy xop te hām'āktux, tu yāy yīy'ax hā hāmyūmmūg. ¹¹Āte' yīy'ax yūmmūg hok, puxix tik puknōg hām'āktux, tu 'āhā' puknōg, ha hamūn hāk puknōg kamah. ¹²Yīy xax, pu Topa Koxuk 'āka'ogā', pa' xax hāmāxap, pu 'āka'ogā, xayīy 'ānōy xop ka'ogā kamah.

¹³Yā' max tikmū'ūn te' yīy'ax puknōg hā' yīy, pāyā max xexka', 'ūnōy xop pu hām'āktux yūmmūgā', nūy tikmū'ūn yāy yīy'ax hā hāmyūmmūgā', puyīy hāmyūmmūg. ¹⁴Topa pu 'āte hām'āktux, 'ūyīy'ax puknōg hāk yīy, kopxik kuxa te hām'āktux xe'e', pak putox te hāmyūmmūg 'ohnāg, 'āte' yīy'ax puknōg yūmmūg 'ohnāg tu'. ¹⁵Āte putep mūn mīy'ax? Āte Topa pu hām'āktux yāy kuxa hā, tu' yīy'ax puknōg hāk yīy, pa yāy putox hā 'āte hām'āktux kamah, nūy tikmū'ūn yāy yīy'ax hā hām'āktux, hu hāmyūmmūg. ¹⁶Ākuxa hā xate Topa pu hām'āktux, puxix 'āxape' xupax, pāyā' yīy'ax yūmmūg hok, puxix hām'āktux yūmmūg hok, nūy tu: Hamūn, kaxīy. Yā' hitop hā' xupak, 'ūyīy'ax puknōg yūmmūg 'ohnāg tu'. ¹⁷Yīy xate hām'āktux māynāg, 'ihā Topa pu hām'āktux, pāyā 'āxape xop mō'nīynām 'ohnāg. ¹⁸Āte Topa pu: Āmax Topah, xatek ka'ogāhā, 'ūg yīy'ax puknōg hāk yīy punethok, kaxīy. Yāk yīy punethok, ha ta 'āxop yīy kutōgnāg. ¹⁹Pāyā yāy kotīnnā' xop mūtīk tihī', kopxix tikmū'ūn yāy yīy'ax hā hām'āktux, 'ātep-tup, pu tikmū'ūn yōg hām'āktux kutōgnāg 'āpax, puyīy Topa' ka'ogā, pu' nōy xop pu nō hām'āktux. Pa' yīy'ax puknōg hāk yōg tox 'āte putup'ah.

²⁰Ūkxape: Āxop hā kaxxop'ah, pāyā hāpkummuk mīy hok, kaxxop putuk, 'ihā hāmpē'āpaxeh 'ūxip tap xop putuk. ²¹Yā Topa yōg tappet te Topa yōg hām'āktux'ax 'āktux, hu:

“Āte nūhū tikmū'ūn pu hām'āktux putup,
tu' yīy'ax puknōg hā hām'āktux putup,
xi' puknōg yīkox hā hām'āktux putup,
pa yōg tikmū'ūn te hām 'ūm 'āpak 'ohnāg,” kaxīy.

²²Tikmū'ūn te' yīy'ax puknōg hā Topa pupi hām'āktux, puxix tu' kuxa mām hok xop pu hām'āktux, yā hāpxopmā xe'ēgnāg, pāyā' kuxa mām ka'ok xop pu hām 'ūm 'āktux'ah. ²³Āxop yāykotīnnāhā', 'āxohix te' yīy'ax puknōg hā 'āyīy, puxix hāmyūmmūg hok xop te: “Ūxohip-tox kummuhnāg!” kaxīy. ²⁴Pa 'āxop xohix te Topa pupi hām'āktux, 'ihā' kuxa mām hok xop mōxakux, puxix hām'āpax, tu yāy yōg hāpxopmā'ax kummuk tu' yāyhāhup, ha Topa te' kopit putup, hamūn te hāmyūmmūg hah. ²⁵Ha Topa te hāmpē'paxex yūmmūgāp-tup, yīy nū'xup putup, 'ūkuxa te' yēy tu!, tu: “Yā hamūn! Topa te 'āxop mūtīk pip!” kaxīy.

Hāpxopmā max 'ihā yāy kotīnnā' pip

²⁶Ūkxape xop, 'āte xe xa hām'āktux putup. Āxop yāykotīnnā' pip 'ihā', yā' max 'āxape 'ūm kutex, nūy Topa 'āktux max, xi' nōy hāmyūmmūgā', xi' nōy te Topa yōg hām'āktux xe'e' 'āktux, Topa te' yūmmūgā tu' xuktux. Xi' max, 'ānōy yīy'ax puknōg hā tu yīy, xi' nōy te yīy'ax yōg hāmyūmmūg'ax 'āktux, tu tikmū'ūn yāy yīy'ax hā hāmyūmmūgāhā', puyī' kuxa mām xop xohix mō'nīynām. ²⁷Āxop 'ūm

yīy'ax puknōg hā 'āyīy putup, 'ihā 'āyīy, 'āp-xet yīy hāmāxap, xik-nāy tu' nōy yīy, xik-nāy tu' noy, tu mōktu yā tikoyuk yīy, tu' hip, pu' nōy 'ūyīy'ax puknōg hā' yānān, nūy tikmū'ūn yāy yīy'ax hā' xuktux, puyī' xohix hāmyūmmūgā'. ²⁸ Ūxip hok tik te' yūmmūgā', ha ta' kux, tu yāy pu hām'āktux, xix Topa pu hām'āktux yāy kuxa kopah. ²⁹ Tikmū'ūn 2 tu yīy kux, pe 3 tu yīy kux, xa' hip, pu' nōy xop kopit, 'ok pe tik te Topa pupi hām'āktux, 'ok pe' koxuk puknōg pupi hām'āktux. ³⁰ Ūxape yok, tu hām'āktux putup, 'ihā' nōy te Topa pupi hām'āktux, puxix tikmū'ūn māxap hā hām'āktux kux, tu ta' yūm, pu' nōy Topa yōg hām'āktux 'ūyānān tu 'āktux. ³¹ Āxop xohix te Topa pupi hām'āktux'ax, 'ūp-xet hāmāxap, hak-nāy tu' nōy te', xik-nāy tu' nōy, tu mōktu 'āxohix te hām'āktux kux, ha kaxīy 'āxop te hām'āktux xohix yūmmūg putup, nūy tu hittup. ³² Tikmū'ūn te Topa pupi hām'āktux, puxix yāy mūn xat, 'ok pe' max hām'āktux, 'ok pe' kummuk hām'āktux. ³³ Yā Topa te yūmmūg xānā hok, 'ūg hāpxopmā kummuk, pa yūmūg xānāhā 'ūg hāpxopmā max.

Ha kaxīy 'ūkuxa mām ka'ok xop xohix yāykotīnnānā' pip. ³⁴ Ha 'ūn xop yīy hok. 'Ūxat hok, puyīy hām'āktux hok. Yoneo xop yōg xat'ax te' xat hok kamah, yīy tux hok, pu 'ūn kuxa mām ka'ok xop xat hok kamah. ³⁵ Ūn te' yīkopit putup, puxi' hip, nūy yāy pet kopa yāy yīpxox yīkopit. 'Ūn te hām'āktux, 'ihā' xohix yāykotīnnāhā' pip, puxix tu hupmā'.

³⁶ 'Ok 'āxop te Topa yōg hām'āktux mīy? 'Ap mīy'ah. 'Ok pe Topa te mō'āp-xet kutnāhā'? 'Āmhok. ³⁷ Āxop 'ūm te yāy xexka pe'āpaxeh, nūy mō 'ākutnāp-xet pe'āpaxeh, xix Topa Koxuk te 'āka'ogā'ax pe'āpaxeh, kopxix xa hāmyūmmūgā'. Yūmūg xuxyā tek xat 'ūxa kax'āmi'.

³⁸ Tikmū'ūn 'ūm te hām'āpak hok, 'āpu nōm pu 'āyipkox pip hok kamah.

³⁹ Ūxape xop: 'Āpu, Topa pupi hām'āktux pax, tu' tux hok, pu yīy'ax puknōg hā tu yīy kamah. Yā' max. ⁴⁰ Pāyā hāpxopmā māynāg, 'ihā yāykotīnnāhā' 'āpip.

Kunnix te putpu' hi'

15 ¹ Āte xa hām'āpak max'ax 'āktux, ka' xaxok. 'Āxop te hām'āpak, yā 'ākuxa mām ka'ok hōmā xix hōnhā'. ² Yā hām'āpak max'ax hā 'āxop kuxa tup, tu' mām ka'ok 'āmō kuma 'āmōg. 'Ok pe 'ākuxa te yā hitop hā' mām ka'ok.

³ Topa te 'ā hām'āktux, ha 'āte xa' xuktux, yā hām'āktux xe'e', hu: Kunnix xok, yūmūg pupi' xok, yūmū'āte hāpkummuk mīy pax ha' xok, ha Topa yōg tappet te' xuktux, ⁴ ha nō hāpkot, ha 'āmnīy 3 nōg, 'ihā' putpu' hi', ha Topa yōg tappet te' xuktux, ⁵ ha Pet te Kunnix pēnāhā', hak-nāy tu mō'pok xop te 12 te' pēnāhā', ⁶ hak-nāy tu tikmū'ūn te 500 te' pēnāhā', nōm xop kuxa mām ka'ok te 500 te' pēnāhā'. Tikmū'ūn 'ūm yā' pip, pāyā' yāg xakix hittap. ⁷ Hak-nāy tu Tiak te' pēnāhā', hak-nāy tu mō'pok xop xohix te' pēnāhā'.

⁸ Ha ka'ax hā 'āte Kunnix pēnāhā', 'ūka'ax hāk kuxa te yūmūg xuxyā kopa' yūm ka'ok. ⁹ Yā 'āte mō'pok xop hāk ka'ax, tuk kutōgnāg, huk xax te kutuk, tu yāyhāhup, pāyā Yeyox te nūgkutnāhā 'ūka'ax hā. Hōmā 'āte kuxa mām ka'ok xop xūygāhā', huk xax te kutuk. ¹⁰ Pa Topa te 'ā hāmmaxnāhā', huk mōgkutnāhā, ha 'āte hāpxopmāhā punethok, ha mō'pok xop nōy hāpxopmā

kutōgnāg, pak puxet'ah, yā Topa tek ka'ogāhā, 'üyīy hāpxopmā ka'ok. ¹¹Yīy 'ātep yūmmūg putup'ah, 'ok pek hām, 'ok pe yāk nōy hām, pak mūg xohix te hām'āpak max'ax 'āktux, ha 'ākuxa mām ka'ok hām'āktux'ax kopah.

Yūmū'āte putpuk hip-tup

¹²Hak mū'āte Kunnix te putpu hi'ax 'āktux. Tep te xīy 'āxop 'ūm te: “Yūmūg yog xakix xop te putpu hip-tup 'ohnāg,” kaxīy. ¹³Pax pu' xakix xop putpu tu hi hok, puxix Kunnix 'a putpu hi'ah kamah. ¹⁴Pax pu Kunnix putpu tu hi hok, kopxik mūg hitop hā hām'āpak max'ax 'āktux, ha yā 'ākuxa kama 'ūhitop hā' mām. ¹⁵Kamah: Kunnix putpu tu hi hok, kopxik mūg yā' koit, 'ihā Kunnix putpu hi'ax 'āktux. Pax pu' xakix xop putpu tu hi hok, puxix Topa yā Kunnix putpu hīnnā hok kamah. ¹⁶Pax pu' xakix xop putpu tu' hi hok, puxix Kunnix putpu tu hi hok. ¹⁷Pax pu Kunnix putpu tu hi hok, puxix 'ākuxa hitop hā' mām ka'ok Kunnix kopah, ha 'ākuxa tup 'ohnāg. Yā' kummuhnāg. ¹⁸Pax pu' xakix xop kuxa hitop tu' mām, tu Topa yōg putat hā' mōg hok, puxix tu Topa hāptox hā' pi nōmhā'. ¹⁹Pax hām tup-xet hā yūmū 'āte Kunnix hip, xix pexkox hā yūmūg mōg hok, puxix yūmūg kuxa xakix putūmnāg, yūmūg hittup 'ohnāg tu', ha' kuxa mām hok xop tu hittup.

²⁰Pāyā Kunnix te putpu hi xe'ēgnāg, 'āte hāpxe'e 'āktux, yī' xakix xop te putpu' hip-tup kamah. ²¹Tik puxet 'Anāo te hāpkummuk mīy, yīy yā' xohix xakix, hā kaxīy tik puxet nōy te' putpu' hīnnāhā'. ²²'Ūxohix xakix mōnāyxop te māxap 'Anāo hah, hā kaxīy 'ūxohix te putpu' hip-tup, Kunnix hāh. Yā Kunnix te' putpu' hīnnāp-tup. ²³Tu ta putpu' hi hāmāxap, hak-nāy tu Kunnix yōg tikmū'ūn hip-tup, 'ihā Kunnix putpu' nūn. ²⁴Yā hāmyāxatamuk ka'ax xohix yōg xox putox, ha Kunnix te hāpkummuk xop yōg xexka xop xohix nōāp-tup, xi' xat'ax kummuk xop xohix nōāp-tup, nūy Topa yūmūg Tak ha' nūnnā', puyīy Topa pu' yīpkox pi'. ²⁵Ha Kunnix te' xat putup, tu mōktu Topa te' gāyxop kuxyā', tu mōktu hāmgāy xop xohix kuxyāhā', tuk-tok Kunnix ha' nūnnāp-tup, pu tu' nōa'. ²⁶Ha' ka'ax hā Topa te' xat putup, puyīy tikmū'ūn xakix hok, ²⁷yīy Topa yōg tappet te: “Topa te' xexka xop xohix nūnnāhā', pu tu' yīpkox pi',” kaxīy. Pāyā Topa mūn xexka', tu Kunnix ha' nūnnā'ax hāmgāy xop yōg xexka xop, ²⁸tu' kuxyāhā', puxik-tok te yāy Tak pu' yīpkox xhip, pu tu' xat, tu' hep xop xohix xat'ax, 'ūxexka xe'ēgnāg tu'.

²⁹Tikmū'ūn 'ūm te' nōy xok tup-tox pix, yīy 'āte 'āyīkopit, hu: Teptu xatep-tox pix 'āxape xok pupi', 'ihā xate' putpu' hi'ax 'āktux hok? ³⁰Xik mū'āg. Tep tuk mūg xūy, xik mūg xakix putūmnāg, nūy hām'āpak max'ax 'āktux? ³¹'Ūkxape xop, 'āte xa hām'āktux, tu hāpxe'e 'āktux. 'Āmnīy xohix 'ihāk xok putūmnāg. 'Āte xa hāpxe'e 'āktux. 'Āxop te hāpxopmā max, yīk hittup, yā yūmūg kuxap-xet yūmūg xuxyā Yeyox Kunnix kuxa mūtik. ³²Hōmāk xip nūnte kōmēn 'Epex tu', ha' gāy xop te hāmgāy putuk, tuk putex putup, 'āte hām'āpak max 'āktux hah. Pax 'āte hām'āktux, puyīy tikmū'ūn 'ūgmax 'āktux, kopxi' hitop hā hām'āktux. Pax pu' xakix xop putpu tu hi hok, kopxix max yūmūg hāpxopmā hāmpuknōg xop putuk, ha: “Āpu yūmūg xit, xix xo'op. Yā hāptup 'ihā yūmūg xakix,” kaxīy. Yā' hitop hā hāpxopmāhā'.

³³ Yāy hā mō'āmā hok. Tik kummuk mūtik 'āmōg, hu ta 'ākummuk kamah. ³⁴ 'Āpu hāpxopmā kummuk kuxyā', tu Topa yōg putat hā 'āmōg putpu'. 'Āxop 'ūm te Topa yūmmūg 'ohnāg. 'Āte xa' xuktux nūy xa' hupmā'.

Yūmūg yīn te putpu' hip-tup

³⁵ Pa tikmū'ūn 'ūm xek yīkopit, hu: “Tep te xīy 'ūxakix xop putpu hip-tup?” kaxīy. “'Ūyīn te xīy?” kaxīy. ³⁶ 'Āxop te hāmyūmmūg 'ohnāg! 'Āxop te hāpxop xap xok 'ihā' xok, pu tu' xokax. ³⁷ Ha' xap, 'ok pe xuxnāg xetox xap, 'ok pe mīxux xap nōy, 'ūxap mūn 'ap mīxux yīnmūn'ah. ³⁸ Ha Topa te hāpxop xap xohix yāyhā mīxux, yā Topa tep-tup.

³⁹ Ha' hi'ax xop xohix punethok. Yā tikmū'ūn yīn puxet, xix xokxop yīn yā' nōy, xix putuxnāg xop yīn yā' nōy, xix mām xop yīn yā' nōy.

⁴⁰ Ha pekkox yōg xop yīn yā' nōy, xix hām xexka yōg xop yīn yā' nōy. Ha' xohix max, pāyā hāmmax nōy. 'Ap nōy putuk'ah. ⁴¹ Māyōn max, tu hāptupmāhā', ha māyōnhex max, tu 'āmnīy tupmāhā', ha māyōnnāg xop xohix max kamah, tu hāptupmā nōy. 'Ap nōy putuk'ah.

⁴²⁻⁴³ Ha kaxīy 'ūxakix xop te putpu hip-tup. 'Ūyīn yā hahām yōg, ha nō hāpkot, 'ūkummuk tu', yā' xok xe'e'. Pa putpu' hi, 'ihā' yīn tup, tu yīn ka'ok, tu yīn max, 'a xep xok putup'ah. ⁴⁴ Putpu' hi, 'ihā yā pekkox yōg yīn. 'Ūyīn hittap yā hām yōg, ha' yīn tup pekkox yōg. ⁴⁵ Yīy Topa yōg tappet te: “Tik te māxap 'āxet'ax 'Anāo, ha Topa te' hīnnāhā,” kaxīy. Pa 'Anāo nōy 'āxet'ax Kunnix, tu hāpxohix hīnnāhā'. ⁴⁶ Tu hām yōg yīn mīy hāmāxap, nūy kunāy tu pekkox yōg yīn mīy. ⁴⁷ Ha 'Anāo te māxap mīy, 'ihā hāpkōnōn hā' mīy, pa 'Anāo nōy te pekkox tu' nūn. ⁴⁸ Hām xexka yōg xop te hām yōg 'Anāo putuk, ha pekkox yōg xop te 'Anāo nōy putuk, nōm te pekkox tu' nūn. ⁴⁹ Yūmū'āte hām yōg tik putuk nōmhā, pāyā tik nōy te pekkox tu' nūn, ha yūmū'āte Kunnix putuk putup.

⁵⁰ 'Ūkxape xop, 'āte xa hāmyūmmūgāp-tup, hu: Tikmū'ūn yīn yā hām yōg, ha' yīn xi' hep 'āta hā' mīy, yīy Topa pēnā hok pekkox kopah, tu pekkox yōg hāpxop pop hok kamah.

⁵¹ 'Ūg 'āpax, nūy hām'āktux xe'e 'āpax. 'Ap xohix xakip-tup'ah. pāyā yūmūg yāyhāp-tup pekkox yōg tikmū'ūn, ⁵² hāpxip 'ohnāg 'ihā', tikmū'ūn pa xax te kutāgnāg, 'ihā yūmūg yāyhā pekkox yōg tikmū'ūn, 'ihā mīxux xop tut kāyāp-tup. Ha' xakix xop te putpu hip-tup, 'ūyīn yā pekkox yōg yīn, tu putpu' hip-tup, ha yūmū'āte yāyhāp-tup kamah. ⁵³ Yā Topa te hām yōg yīn xit putup, nūy pekkox yōg yīn hā yūmūg mō'tat 'ūyānān tu', pu tu xakix'ax xop yāyhā xakix hok xop, ⁵⁴ Ha pekkox yōg yīn hā mō yūmūg tat putup, 'ūyīy yūmūg xakix hok, yā Topa te' xat putup, nūy yūmūg xakix kuxyā', 'ūyīy yūmūg hi xe'ēgnāg mō kumak mog. Yā Topa yōg tappet te: “Topa te' xat hok pu tikmū'ūn xep xakix hok, yīy Topa te' xūy'ax kuxyā kamah, Topa mūn ka'ok xe'ēgnāg tu'.”

⁵⁵ “Tep tu tikmū'ūn xohix xūy?

Teptu tikmū'ūn xohix xakix?” kaxīy.

⁵⁶Yā tikmū'ūn xohix te hāpkummuk mīy, tu' xat'ax pu' yīpkox 'ohnāg, hu' xohix xūy, hu' xohix xakix. ⁵⁷Pa yūmū'āte Topa pu hām'āktux, tu: "Āmax Topah. Xatek mū ka'ogāhā', 'ūyīg mūg xakix hok, yāk mūg xuxyā Yeyox Kunnix tek mūg hīnnā xe'lēgnāg," kaxiy.

⁵⁸Yiy Topa yōg putat hā 'āmōy kuma 'āmōg. Topa pu hāpxopmā max, yā yūmūg xuxyā te xa pagop-tup, 'āxop te' yūmmūg.

Paot te tayūmak pop mōg putup hāpxexka Yonex tu'

16 ¹Hōmā 'āte hāpxexka Ganax yōg kuxa mām xop pu hāmyūmmūgāhā', pu tayūmak pop, nūy Yonex yōg 'ūhok xop pu mō'kutnā'. Yā' max 'āxop kaxiy pop kamah, nūy hok pu popmā', ²yiy: Yenomīn xohix 'ihā tayūmak 'ūm mōy, nūy xeh, nōm tayūmak 'āxop te' pop'ax, tu mōktu 'āhak xupep, pu tayūmak pop hok 'ihāk nūn. ³Tuk xupep 'ihā, 'āte tappet mīy putup, nūy mō'kutnā', 'ihā 'āxop te tik xop yīmōgatux, pu tayūmak mōgā kōmēn Yenoyanēn hah. ⁴Pek mōg kamah tik xop mūtik.

Paot te hāmp'e'paxex

⁵Ūgmōg putup hāpxexka Māxenōn ha hāmāxap, nūy kunāy tu 'āhak mōg, ⁶Pak xip ka'ok putup 'āxop mūtik hām'āxī hā, ha 'āxop 'hā 'āte'ax, pu 'āte hāpkumep kumaknāg. ⁷A 'ātep-tup'ah 'āxop tuk xip pu'ūgnāg. Topa 'ūkputup, 'ūkxip ka'ok.

⁸Nūn tek xip putup 'Epex tu', tu' hip, pu Yoneo xop yōg 'āmuk xexka 'āxet'ax Pētekot mīy, ⁹puk hām xexkah, nūy hām'āpak'ax max 'āktux, tikmū'ūn xohix pu', pa tikmū'ūn yāg te hām'āpak max'ax putup nōg.

¹⁰Timōn xupep 'ihā', mōy xānā' pu 'āpet kopa mō'xip, nūy nō hittupmā'. Yā hāpxopmāhā 'ūgmūn putuk, tu yūmūg xuxyā pu hāpxopmāhā'. ¹¹Pūyā Tīmōn pe'āpaxeh kutōgnāg hok. 'Āmhok, pa hā tu' tehe', pu tu mōg, 'ūkuxa yūm 'ihā', nūy 'ūgha nū putpu'. 'Āte' hip, pu nūk xape xop mūtik.

¹²'Āte 'Apot 'āktux putup. Hōmā 'āte tu hām'āktux, tu xe' xuktux, pu 'āha mōg, yūmūg xape xop nōy mūtik, pa tute hāmp'e'paxex, tu hōnhā' mōg putup'ah. Hāpxip kutōgnāg, puxi' mōg.

Tu ta hām'āktux kux

¹³Ōg pa mōxip, 'ākuxa mām ka'ok. 'Ākuxānōg hok, nūy ta 'aka'ok.

¹⁴'Āpu 'āhām, 'ihā 'ānōy putup pax xexka'.

¹⁵'Āxop te 'Exteo yūmmūg, xi' xape xop. Nōm xop kuxa mām hāmāxap hāpxexka Genex tu', tu Topa yōg tikmū'ūn pu hāpxopmā max. 'Āte xa tu' xak, yāk xape xop, ¹⁶pu nōm xop xi' xape xop yōg hāpxopmā'ax tat, tu hām'āpak, nūy nū mūtik hāpxopmā, xa hā tu tehet.

¹⁷'Ūgkuxa hittup, 'ūkxape xop nūn, hak kuxa hittup. Yā 'Exteo nūn, xix Potōnān nūn, xix 'Ahkax nūn, ha mōgnīynām 'āxop pupi', 'āxop pip hok hah. ¹⁸Ha mōgnīynām xexka', tu mō'ānīynām kamah. 'Āte' yūmmūg. Yā' max yūmū'āte nōm xop 'āktux max.

¹⁹Hāpxexka 'Ax yōg kuxa mām xop te 'āneo. 'Ak xix Pinixit te 'āneo, xi' kuxa mām xop te nōm pet tu yāytu nū'nāhā', tu 'āxop pu 'āneo hōm. ²⁰Hayūmmūg xape xop nūnte' pīp, tu xa 'ūyīmā'ōy, tu 'āmūg putup yāy kep hā, 'āp-tup pax tu!

Yūmūg xape xop xohix pu 'āneo hōm, 'ūgmūn pupi 'āneo.

²¹'Āte tappet kup paha', nūy tappet mīy, hu: 'Ūgmūn Paot te xa 'āneo.

²²Nōm xop te yūmūg xuxyā putup nōg, pūyā Topa nōm hā hāpkummugā'. Yā yūmūg xuxyā nūn putpu', yīy mā', Yāyā'!

²³Pūyā yūmūg xuxyā Yeyox xa hāmmxnā'!

²⁴Yā 'āte 'āxop xohix putup pax Yeyox Kunnix hah. Tu ta tu' kux.